

KUTAMILISYA NDAMILO JA KUPOPELA

MTWE WA 1

KUWUCISYA NDAMILO JA KUPOPELA

Malowe Ga Ndanda

Mlongosi jwine Ambuje wamjamwice mlope pa cindu cakusosekwa mu umi wakwe, yakuti kajende ni Ambuje lisiku lililyose lya umi wakwe. Katatu pa cijuma Ambuje wamjimwisye ciло ni kumsalila ya kuleplela kwekulungwa mu umi wakwe. Mpela Atati ni mwanace jwao, wawecete mwa cisuwelo nambo soni mwangasisa ni jwalakwejo. Akusawaga wakuyamika mlope ligongo lya kwiganyidwa ni kwamucidwa ni Ambuje. Akwete lisosa lya kupikana ni kutenda malowe gakwe. Walembile yosope yene yiwasalile kuitila mu nganisyo syao, pakuti wamanyilile kuti yeleyi nganiyiwa yakusosekwa womwanjavo mpela mlongosi jwa mpingo nambo soni ligongo lya unakajumo wa pa mpingo pavo.

Acimlongosi wa usimu akwete udindo wekulungwa pameso pa Mluntu kwa wandu wakwalongolela, ligongo wanduwo akujembecela jemanjavo kuti walongolele. Umi wetu ukusaweceta yejinji mpela yigakuti kuweceta malowe getu, ni ngondolo sya Mluntu sicilola, kupikana ni kuya mu sajo sya wakusicinga.

M'we acimlongosi wa mpingo ngawa mkwalongolela wandu wetu ku malo gakuti ganitijauleje mu kwenda kwetu ni Mluntu. Konjecesy pelepa naga tuli tugwile ni kulepela wandu wane mwakutesya canasa, akusawujila panyuma, pane kulemala kwene mu kwenda kwao ni Mluntu. Yeleyi yikusatendekwa atamose nganitusaka kuti tulepele soni atamose kulepelako nganikumanyika ni wandu.

Yeleyi yaliji yisyene mu umi wao, pakuti ngamkanatenda mele calicose ciwacimanyi kuti mpaka cijonanje umi wa usimu wa wandu mu mpingo mwao. Ni mulijiganyo alino akusaka kusala yindu yiwalijiganyisye mu ndawi ja padela jiwakwete ni Ambuje.

A. MAPOPELO MU MPINGO WA NDANDA

Pandanda tulole mu ndime syandanda sya buku ja masengo. Mwalekwemo akusala muwaweletele mpingo wa Ambuje Yesu uli natandape. Watendite canti myi.

1. Mpingo Wandanda Wapali Ni Mapopelo

Yesu ali ajimwice ku wawe, walecele wakulijiganya wakwe malamusni gane gakuti akuye. Wajenele kuti ajembecela (kupopela) mu Yelusalemu mpakana ali angumbalidwe (kuwecedwa) ni macili gakwinani, malingana ni cilanga ca Atati (alo Luka 24:49)

Mluntu mu buku ja Masengo 1:9 akutusalila cicatendekwe kanyuma kakwe;

“Piŵawecete yeleyi, Yesu ūajigalidwe kwawula kwinani, jemanjajo alimkulola. Nipo liwunde lyamwunicile ni nganawoneka soni”

Wakulijiganya waliji pa litumbi lya Olifi payatendekwaga yeleyi. Kaneko wajesile mkuli umo kuwujila ku Yelusalemu kuwasimanaga mu cumba ca penani. Mwelemu watendite mapopelo gagajigele mowa likumi. Mwaliji mwana wandu wakwana 120.

Cindimba ca pentekosito cayice mowa likumu gakuyicisya, waliji ciwele **mkupopela** pamo, pele mwacisipucisya paliji pana lisegwe kutyocela kwinani mpela mbungo jekulungwa. Jagumbele mu nyumba muwalijimo nipo wosome wagumbalidwe ni Msimu waswela.

Kuyicisya ulaliki wa macili wa Petulo, wandu wakwana 3000 wakulupwice. Mwa lukondwa waliwanjile ni wakulujigana wane. **Lisiku lililyose** wajiganyidwaga ni wandumetume ni wasimanaga mu nyumba syao mwa unakajumo kuti alile pamo ni **kupopelela** pamo. (aloje Masengo 1:1 – 2:42

Mpingo wapali kutyocela mcilu ca mapopelo. Masiku likumi gakupopela gakopwece kwika kwa Msimu waswela pa lyuwa lya Pentekositi – soni wakusimonjesya mlope wandu wakwana 3000 wakulupwice. Wandu mu ndawi ja pentekositi waliji wandu wakupopele lisiku lililyose.

2. Lipopelo – Macili gakupundanganya

Kupopela ka lisiku lililyose kwa wandu mu mpingo wandanda nganikugamba kutandisya pentesiti pe basi, nambo kwapelengeny kuwa macili gakupundanganya mu mowa gakuyicisya; aloje pa Masengo 3:1,

“Lisiku line Petulo ni Yohane ūapite ku Nyumba ja Mluntu ndawi ja kupopela ja 3 koloko ligulo.”

Ngani jakwe ajimanyi, ajo jalijo ndawi jele mundu jwamlemale, juwatamaga pa cipata ca kolanjidwa ‘mlango wakusalala’ jula waponile. Kupitila mu cakusimonjesya celeci, likuga lya wandu wakulupilila lyakwanile wandu 5000.

Nambo wakulamula nganasangalala ni yeleyi, ni watawile Petulo ndi Yohane. Kundawi kwakwe wagopwele ni kwajogoya kuti akasalalicila soni ya Yesu. Nambi Petulo ni Yohane wajanjile cici? Aloje Masengo 4:23,24,31

“Petulo ni Yohane ali ūagopwele, ūapite kwa acimjavo ni ūamanyisye yosome yele acakulungwa ūa ūakutaga mbopesi ni acakulungwa ūane ūa Ayuda yiwasalile. Piŵapikene yeleyi, wosome ūapopesile pampepe mwakwesya malowē ... Piŵamasile kupopela, nyumba jele jiwasongenejo jatenganyice, wosome ūapocele macili ga Msimu Ūaswela ni ūatandite kuŵeceta malowē ga Mluntu mwakulimba mtima.”

Soni pa Masengo 5:12 akuweceta kuti;

“Wandumetume waliji m'kutenda yimanyisyo ni yakusimonjesya yejinji pasikati pa w'andu wosope wiwakulupilile Klistu wasonganaga mwa mtima wakupikanganana mwipenu lya Solomoni”*

Pelepa soni wasonganaga kuti akole ndawi jakupopelela yimo. Ngani jine jakusangalasya jisalidwe paMasengo 6:1-4. Acimlongosi wasimanaga ni cakusausya mu msongano wao wasakaga kumanyilila kuti tayimasye uli. Kwanga kwaliji kwa lunda kwakusosekwa. Kwaliji kwakuti kwape wandumetume ndawi jakuti apelenganye mu ‘utumiki wa kupopela ni malowe’

Pa Masengo 7:55-60 tukulijiganya ya mundu jwine line lyakwe Sitifano juwaliji jwandanda kuti awe ligongo lya cikulipi mwa Yesu. Pawagwaga pasi amagongo wakwe ali mkusoma maganga, wagumisile ni **lipopelo**, ni Ambuje waonece ali ajimi ku mkono wa mlyo wa Mlungu, kosecela kuti apocele msimu wakwe.

Mtwe wa ngani ja mapopelo ukupelengana pa Masengo 8:14,15;

“Piwapikene wandumetume wiwatamaga ku Yelusalemu kuti, w'andu wa ku Samaliya apocele malo'we ga Mlungu, watumicisy'e Petulo ni Yohane. Piwayice jemanjajo, wapopelele wiwakulupililewo kuti apocele Msimu Waswela.”

Soni pa Masengo 9:10,11 akuweceta uti;

“Ku Damasikoko kwapali jwakulijiganya jwine lina lyakwe Ananiya. Jweleju waweni Ambuje kupitila m'mesomkulola ali mkumwilanga kuti, “Ananiya!” Ni jwajanjile kuti, “Ndili apano Ambuje.” Ambuje wamsalile kuti, “Mjawule litala lya mu msindamo, likuwilanjidwa, ‘Litala lya Goloka.’ Nipo ku nyumba ja Yudasi mkawusye mundu jwa ku Taliso lina lyakwe Saulo, akupopela pandawi jinojino”

Takumbucile kuti Saulo asimene sampano ni Ambuje Yesu pa ulendo wao wa ku Damasiko. Wagwisidwe pasi ni kuwa wangalola ligongo lya kuwala kwa ucimbicimbi wa Mlungu. Meso gawo ga usimu gawugulidwe ni wapali mwasambano mwakusimonjesya pe lyelo lisikuli. Wasindidwe kwa mbumbu.

Komboleka soni kuti Ananiya waliji mkupopela pawapocele meso mkulola . pandawi jijojo soni Paulo waliji **mkupopela**, ligongo nganamanyililaga cakutenda. Mapopelo gelego gakwete macili gakuti gacijenda mu mbili mpaka mu mowa getu gano.

Elo wandu wa mu ndawi ja pentekositi ali wandu wa mapopelo. Pakusapopela, Msimu wa Mlungu akusajenda mwa macili. Pakusawa pana kululuka, kpona ku yilwele, yakusimonjesya ni cilongosyo! Akusapopela ndawi syosope, ni pane palipose ni Mlungu akusawa papopo kutenda lisosa lyakwe.

Kombeleka kuweceta kuti buku ja Masengo jili ngani ja mapopelo. Gatandite pa lyuwa lya pentekositi ni Msimu wa Mlungu ni nganigaleka.

Kwa wakulupilila mu mpingo wasambano, mapopelo caliji cindu ca lisiku lililyose. Jaliji ndamilo, jangausya nambo jakusosekwa mpela kupumula. Kusyenedi kwaliji kupumula kwa umi wao wasambano mwa Msimu.

B. MAPOPELO GA KULIPELEKA - NDAMILO JA LISIKU LILILYOSE

Sano jili ndawi ja mapopele ga lisiku lililyose gawawecetaga Ambuje kwa munduju. Wamsalile kuti aliwalile kuligosa kwakola ndawi ja kupopela pajika. Wakundile yindu yine kuti yisokonasye ndawi ja ji jawo ni Ambuje.

Ngakuweceta kuti nganapopelaga ata panandi. Kusyene akusapopela mlope. walijiganyisye kupopela ali mwanace. Watandite ni lipopelo lya mwanace, lyakusalimanyililaga wandu wajinji lyakuti; "sano nguti ngone, ngupopela Ambuje, asunje umi wangu" kaneko ni wapolelaga " mwajaliwe mama ndi baba, acimwene ndi cemwali, atukamucisye kuwa wakoseka pataciyika, naga ndesile cine cakwe cakusakala lelo, ngwawenda kuti angululucile ni kuswejesya mtima wangu. Wajaliwe soni acalongo acimjetu wosome ni angamucisye kuti ngakola sagamisi syakusakala. Mu Lina lya Yesu."

Pane pawaga yindu yine yakonjecesy nambo ndawi syejinji lyele ni lipopelo liwakusile ali mkupopela.

Atamose lelo jino pakusaka kupopela akusapitaga mmomo pakwaula kugona. Ngakusaliwona kuti apundile kuwa wakuwona mpela mwanace jula. Akusapopelape kuti, "Ambuje sano nguti ngone, ngwayamika ligongo lya malowe gawo gagakuweceta kuti wandu wali pa mtendele ni wao tacigona mwa mtendele. wajaliwe wa mkwangu, Anna, wajaliwe wanace wangu ni aciwamkwawo ni yisukulu yangu." Kanako tiwasale wandu wane mwacitema ni kugona.

Waliwonaga kuti ali mundu jwakupopela, mwine soni wao akuganisya myoyo.

Mpela mlongosi jwa mpingo, ndawi syejinji walongolelaga mapopelo mu mpingo ndawi ni katema. Akusapopelaga soni yiwanja yamwana mwana mu mpingo. Akusapopelaga ni wandu wakusasaka cikamucisyo ca usimu kwa womwanjawo. Pana ndawi syakuti Mlungu akusiwalongolela mu mapopelo ga wandu wane pa cilambo ca pasi. Mu lisiku lyosope ndawi ni katema akusawendaga kwa Mlungu kuti wajiganye naga kuli kwakusosekwa.

Konjecesy pelepa ajiganyisye kwejinji pa ngani ja kupopela. Alembile ni kulalicila pa nganiji. Ni ayimanyi yakwamba mapopelo ni yakuti kapopele. Nambope akwete cakusausya: ndawi jawo ja kupopela mwakulipeleka kundawi nganiciwa mwa ndamilo ja lisiku lililyose.

Nganiciwa cindu cakuti walesile kutenda mwa ndawi jimo. Nambo yindu yine – yine yakoneka yambone – yagambilé kutanda kujigala ndawi ja mapopelo gawo gakundawi.

Mwa cilandanyo kwa womwanjavo, kuli kwangasausya kuti awalanje baibulo lisiku lililyose kulekangana ni kuti apopele lisiku lililyose. Ngukulupilia yeleyi yikusatendekwa ni wandu wajinji. Elo kulijiganya malowe ga Mlungu kuli kwakusosekwa, nambo ulongosi ni camuko ciwapocelaga caliji pa ngani ja umi wa kupopela. (wandu wakusapopela mlope, akusawalanga mlope soni malowe ga Mlungu)

Ambuje walocesye mwangasisa kuti akwenela kutandila soni umi wakupopela lisiku lililyose. Caliji cindu cakuti watendaga kutandila kalakala nambo catandite kuwa mpela cangasosekwa mu lisiku lyao ni Mlungu.

Sano wajenelaga kuti alijiganye soni, ni walijiganyisye soni. Wapite soni ku sukulu ja Yesu, walijiganyisye yindu yakusosekwa yakusaka kutujiganya, kutyocela mu mtima mwao kuja ku mitima jetu.

Mpela mlongosi jwa mpingo, Ambuje wasalile kuti atende kusala kulepela kwao ku mpingo kwao. Wasalile kuti komboleka kuti wane, kapena wajinji wa jemanjavo nganakola ndawi jakupopela. Kwa wane mwa jemanjavo, cakusausyaci komboleka catendite ligongo lya mlongosi jwao – jwangapeleka cilandanyo cambone.

Ni wasalile kuti Mlungu, mwacinonyelo ndi lunda lwakwe wajiganyisye kuti atandile soni umi wakupopela kundawi kwa lisiku lililyose. Wapikanile kwa Mlungu ni kutenda yiwasakagayo

Ligongo wapikanile ni kutandila soni cisyesyene cakutyocela mu Mtima wa Mlungu kwaaula kwa Mlongosiju, waliji wakoseka kwajiganya wane.

1. Mbopele Kwa Ndawi Jelewu Uli?

Liwsyo lyakusakola wandu wajinji ni lyakuti, ana mapopelo gawo gakundawi gaweje gelewu uli? Tinasalile lilamusi sano jino. Akasawika ndawi jakulecele jisyesyene. Taligomece asyene kutandila pandanda. Kupopela kuwe masengo kapena cindu ca usito, mmalo mwa litanga lyakwinjilila mu mkamulano wambone ni Atati wa kwinani.

a. Asagule Ndawi Ja Kupopela

tukwenela kuwika pambali ndawi jakupopela. Naga tuweje mkujigala ndawi jejinji mu kupopela nikuti tujigaleje ndawi ja mnono mu kutenda yindu yine. Ni tukwenela kusagula kuti tulece kutenda cici kuti mapopelo gajigale ndawijo.

Wajinji wetuwe tukusajasa ndawi jejinji ligulo tuli mkutenda yindu yangasosekwa. Mwa cilandanyo wakwete mteto wakupikanila ngani sya ligolo ni ya nyengo mkanawe kuja gona, cele wacityosisye. Jwalijose akwete cindu ca mpaka alece kutenda ligulo lililyose kuti akombole kuja gona ndawi jambone. Kupungula 25 kapena 30 minisi cilicose kugopelela kuti mpaka tujimuce mwacitema ni jele ndawijo kundawi. Jele mpaka jiwe ndawi jakwanila jitukusosa kuti tutande ndamilo jakupopela kwetu kundawi.

2. Kupopela: Unakajumo Ni Yesu

Kukusajigalila cisagula cekulungwa mu nganisyo mwetu kuti tutande ndamilo jinejakwe. Nanga ndamilo jitandite, jikusawaga kuti ni mwawuwelele umi mwetu.

Tukusamanyilila ni kupikana kuti pana cicisonecele naga nganicitendekwa. Tukusapikana unga jikutila kuti nganitutama ni Ambuje mwa padeladelape. Jikusasukadi ndawi ja unakajumo wakuwandika jambone ni jakwikutila.

Elo tukumanyilila kuti ngakola ndawi ja unakajumo ni Ambuje ngayigopolela kuti lisiku lyosope lijonasice. Cikulupi cetu cekulungwa cili mwa jwele tukumsapopelelega, ngawaga mu mapopelo getu. Mluntu ali jwakulupicika kutukamucisya pa ndawi jili jose jitum'wendile.

Nambo yili yisyene kuti yindu yikakombolece kuyiwambala ni pa yine tukapundanganyisye mwangasausya tukawe kuti tukosecele mwakwanila mu ndawi ja mapopelo getu ga kundawi.

Tukwenela soni kumanyilila kuti atamose ndawi syetu sya mapopelo ga kundawi cili cindu ca majali kwetuwe, ikusapeleka soni lukondwa lwekulungwa kwa Ambuje. Nditu akusasosa kuwa ni m'we ni akusatusamalilaga m'we mlope.

Ngawa upile kwetuwe kuti twakomasye Ambuje kutanda kwa lisiku lililyose ni kumanyilila kuti akusacilila kuwa nawo mu cindu cilicose mu umi mwetu. Kwende lisiku ni lisiku tucimbicisyen kusimanikwa kwakwe ni mapopelo getu.

C. NDIME 6 SYA MAPOPELO GA LISIKU LILILYOSE

Pana maupande gakwana 6 gakusosekwa mlope gagakwenela kuwa mu mapopelo getu ga lisiku lililyose. Gali mitwe ga cijiganyo ca lipopelo alino.

I. KUYAMICILA NI KUCIMBICISYA – KULIPELEKA WAO ASYENE

- A. Kola cakulinga cakucimbicisyen
- B. Apelece cilu cao
- C. Ajimbe nyimbo ja sambano
- D. Alambile mu msimu

II. KUPESYA NI KUSWEJEDWA – KUPELEKA MTIMA WAO

- A. Awilasye kawungunya
- B. Akasalambusidwa
- C. Awice jwakulondela
- D. Meso awice pa mbesi

III. DONGOSOLO NI KUPIKANILA – KUPELEKA LISIKU LYAO

- A. Apelece lisiku lyao kwa Mlungu
- B. Awe wangamanyilila mpela mwanace
- C. Awende cilongosyo cakumanyika
- D. Apikanile malamusi

IV. LIWASA NI MPINGO – KWAPELEKA WAKUKUWANDICILA NI WAPAMTIMA

- A. Asale mena ga wa mwiwasa mwao lisiku lililyose
- B. Wawalanjile acalongo acimijawo
- C. Akumbucile liwasa lya Atati
- D. Wakumbucile wakutama jika(wamasije)

V. UDINDO WA MAPOPELO PAKUYICILA CILAMBO NI YESU

- A. Cilandanyo ca lipopelo lya mpingo ni masengo ga utumiki
- B. Yakusausya ya mapopelo: nganisyo syakusakala, yakulinga ni katende
- C. Gopolela kwa Mapopelo ga wane
- D. Macili
pa kwapopelela wane
gatatu gagakusasewesa pa ngondo ja usimu

E. Yindu yitatu yakusosekwa

VI. YILAMBO NI MITUNDU JA WANDU WA KUSA

- A. Kupopelela mitundu ja kusa
- B. Kupopelela wakulalicila
- C. Ngondo ja usimu pa kulalicila
- D. Kupopelela acimlongosi wa cilambo ni Mtendele.

Mu lijiganyo lya baibulo lulisigeleli, tukuye ndondomeko jatusasileji yalumo.

MTWE WA 2

KUTOGOLELA NI KUPEMBESYA
(KULIPELEKA WAO ASYENE)

A. CAKULINGA CA LISIKU LILILYOSE MU KUPEMBESYA

Pa Masalimo 100:4 baibulo jikuweceta kuti; “*Jinjilani ku yipata yakwe mli mkutogolela, mjinjile m’Nyumba jakwe ni malumbo*” pana magongo gawili gekulungwa ga mpaka tumtoglele Mluntu nago.

- Ligongo mwawelete Mluntu – cisyesyene ca mwawelete Mluntu ni ndamilo syakwe.
- Ligongo lya Yatesile – mituka, majali, citetelo, kwanga mapopelo getu ni yine.

1. Kumtoglela Ligongo Lya Mwawelete

Wakunonyelwa nguti nasalile cindu cimo sano jino. Kumtoglela Mluntu ligongo lya mwalele mpakana kwasinde wao. Mpakana atende ni kuweceta kuti, “ Ambuje ngwatogolela lelo jino ligongo ali mkulupusi jwangu. Nganagamba kungulupusya une ligongo lya sambi syanggusya munyuma, nambo ngumanyilila kuti ali mkulupusi jwangu sano jino. Ngumanyilila kuti tangulupusye ku yindu yejinji lelo jino – tangulupusye ku woga, cikayiko ndi kuweceta mwa kupya mtima. Ngwatogolela mlope pakuwa mkulupusi jwamacili ni jwakulupicika kwa une.”

Lisiku line mpaka ajigale mbali jine ja ndamilo ja Mluntu ni kujiganicisa jelejo. “Ambuje ngwatogolela ligongo ali wamacili gosome. Ali wamacili kupunda calicose ca mpaka simane naco lelo jino. Ngusimicisa kuti tandetele ni kulimbangana atamose mu cilicose ca mpaka citendekwe lelo jino.”

Soni mpaka asace kwatogolela Ambuje ligongo ali cisyesyene, “ Ambuje ngwatogolela pakuwa wakulupicika ni wakuwona. Ndawi syosome malowe gao gali gakulupicika – soni gasigalepela. Mu cisyesyene cao mwana mtendele, mpaka jende mu wele mtendelewu lelo jino.”

Pakutenda myiyi mpaka apelenganye kumtoglela Mluntu mu upande wine wa ndamilo jakwe. Pana buku jine jijikusapeleka lina lyapadele kwa Yesu mu lisiku lililyose lya pa caka. Wao atende myoyo mu cijuma cimo. Ngwasimicisa kuti kamcimbicisy Mluntu kawo kaciwa kakunonyelesya soni kangapesya

2. Kumtoglela Mluntu Ligongo Lya Yatesile

Amtooglele Mluntu soni pa ligongo lya Yatesile. Pana majali gane gawatutendele Mluntu gakuti nganituwa tumyamice mwakwanila. Tukusamyamikaga mwakuwilisya wilisya. Cele cili cakusalala kutenda, nambo aganisye ya yindu ya sampano. Asagule cindu cinecakwe capedela ciwatendele Mluntu liso cakuti amtoglele naco. Yele tiyitendesye mapopelo ndi kutogolela kwetu kuwa kwakunonyelesya ni kwangapesya.

B. APELECE CILU CAO KWA AMBUJE

Pa Aloma 12:1 akuweceta kuti;

“Menema ngumchondelela , acimmjangu, pakuwa Mlungu atuendele cansa cacikulungwa iyiyi, myipelece iilu yenu kuti yiwe mbopesi ja cijumi , jajiswela ni jwakwanonyelesya Mlungu, niko kumlambila kwenu kusyesyene.”

Kuli kulambila kwa usimu naga tuli mkupeleka yiilu yetu kwa Mlungu. Ana tukusapeleka yiilu yetu canti uli? Litala limo ni kutindiwala pasi. Naga ngakombola kutindiwala, atame pameso pa Mlungu ni mtima wakulinandiya. (wosome waliji citamile pamo ndawi jele Msimu wayice kwandanda pa lisiku lya Pentekoseto)

Nambo cili cindu cambone kuti tutindiwale naga mpaka tukombole. Mu litala lyeleli tukusalosya lisosa lyetu lyakupeleka mwakulitulisy waclimsyewe kwa Mlungu. Yipundile pagamba kuwa mteto kapena yitendo ya dini. Yikusagopolela kuti tukutindiwasya mitima jetu pameso pa Ambuje.

Pana mata la gejinji gakupelecela yiilu yetu kwa Ambuje. Kundawi kwine nawinile pameso pa Ambuje. Yatendekwe kwa ndawi jamnono nambo nayitesile ni mtima wakuyamika ni walukondwa. Malemba soni gakusatusalila kuti tunyakule mitwe ni magasa getu kwa Ambuje. Alole Masalimo 47:1, *“Kwatani m’yalu ngosyo syosope sya wāndu. Gumilani kwa Mlungu mcijimbaga nyimbo syacisangalalo”*

Ngawa kuti atendeje cindu cimo peco lisiku lililyose. Nambo apelece cilu cawo kwa Ambuje mu litala line lyakwe pakutanda pa lisiku lililyose.

Taciywona kuti kuciwa kwangasausya kana yakusaka ya cilambo pa cilu cawo naga acipeleceje kwa Ambuje. Magasa gakuti anyakulile kwa Ambuje pa kwtogolelela kundawipe, ngasigatenda citema mu kulipeleka ku yindu yakusakala ni ungapikanila. Naga yiilu yetu nganiyipelecegw kwa Mlungu, mpaka tusimane ni yakusausya yejinji.

Kulya mlope, ulesi ni yikululu yakusakala, syosope sili sambi sya ku cilu. Kumcimbicisy Mlungu mu ni cili lili litala limo lya mpaka tuwe wakulimbangana pakucikana cilambo, yakusaka ya cilu, ni satana. Kwende tupelece cilu kwa Mlungu pa kumtogolela lisiku lililyose.

C. AJIMBE NYIMBO JA SAMBANO.

Pa Masalimo 96:1 akuweta kuti, *“Mwajimbile Ambuje nyimbo jasambano; Mwajimbile Ambuje jemanja, wāndu wā pa cilambo cosope capasi”*

Ana yele mpaka yikombolece uli? Nambo nyimbi ja sambano jo jityocele kwapi? Jikusat�ocela kwa Msimu waswela ni mituka jakwe.

1. Mata la Gatatu Gakwimbila Nyimbo.

Malowe ga Mluntu gayisasile yeleyi pa 1 Wakolinto 14:15, “*Tinjijimba ni mtima wangu*,” jwandumetume Paulo wakamulisye masengo mtuka wa Msimu waswela kuti ajimbe nyimbo ja sambano. Soni pa Aefeso 5:19 akuweceta kuti,

“*Mwecetaneje jwine ni mjakwe ni malowē ga a) Masalimo, ni b) nyimbo sya usimu. Nipo mwajimbile Ambuje c) nyimbo ni masalimo mwakusangalala m'mitima mwenu.*”

Alole soni pa Akolose 3:16,

“... *Mjiganyaneje ni kusalilana jwine ni mjakwe ni umanyilisi wosome. Mumjimbileje Mluntu nyimbo sya masalimo, nyimbo sya usimu mwakumtoglela Mluntu*”

Wajinji wetuwe tukusajimbaga masalimo, ana nyimbo sya usimu ndi cici? Asi sili nyimbo sya sambano, syakusatupaga Msimu waswela. Mklistu jwalijose jwamgumbalidwe ni Msimu, mpaka ajimbe mwakamusicidwa ni Msimu waswela

2. Kwimba Masalimo

Acimlongosi acakulungwa kulungwa mu mbili ja mpingo atujiganisyre kuti tutogoleleje pakwimba malemba. Pana buku jine jana mtwe wakuti, “Kuwilanga Mwanganyenjeceya Ku Umi Wakulipeleka Ni Weswela” jele bukuji jalemedbedwe kalakala mu yaka ya mma 17 cakuti. Jwakulembejo watite akhlistu akwenela kwimba cinecakwe kutyocela mu buku ja Masalimo lisiku lililyose.

Masalimo jili buku jambone mwa mpaka tupate nyimbo sya kwimba kwa Ambuje. Jikusatupaga soni cilandanyo cakuti tukuye. Mwenye Daudi waliji wakwimba cenene ku Isilayelo. Watandaga uli lisiku lililyose? Kwanga kwakwe mpaka tukusimane mu masalimo pemo. Kwene tulole Masalimo 5:3; 59:16 ni 57:7,8;

“*Kundawipe walakwe Ambuje, akusagapikana malowē gangu. Ngusapopela kwa walakwe*”

“*Nambo une, tinjijimba nyimbo syakulumba macili gawo; tinjijimba kundawī mwakunyanyika malowē, nyimbo syakulumba cinonyelo cawo cangamala.*”

“*Walakwe Mluntu mtima wangu ukulupilile, kusyene ukulupilile mtima wangu. Tinjijimba nyimbo, nyimbo syakwe syakunonyesya Jimukani m'mwe umi wangu. Jimukani, m'mwe cida cakwimbila ca ngonji ni pangwe tinjijimuka luyuwa mkanilikopoce*”

Ana yosopeyi tiyijigale ndawi jelewu uli? Pandana mwine mbindi sitatu kapena mcece. Nambo pa ndawi jele msimu wetu usimene ni Msimu wa Mluntu mu nyimbo jakusangalala, tuciliwalila ya ndawi, soni mpaka kusimonga kuti jimasile mwa citema.

Kuleka Masalimo pana soni malemba gane ga mpaka tujimbe nyimbo. Ndawi sine Msimu waswela mpaka atupe nyimbo syetusyetupe

Ayi ni yiwayiweni Paulo ni Sila pawaliji mu ndende. Kwende tulole yigakuti malemba pa Masengo 16:25-26;

"Nambo pasikati ciло Paulo ni Sila waliјi mkupopela soni kwimbaga nyimbo sya kumlumba Mlungu, nipo akayidi wane waliјi mkwapikanila. Mwacisisimucisya catesile ciscinya mwamacili, mwakuti catenganyisye yilimbilimbi ya nyumba ja akayidijo. Ndawi jijojo matanga gosope gawugwice, ni maunyolo ga akayidi gagopwece."

Alole macili gagali mu KWIMBA KWA AMBUJE.

D. ALAMBILE MWA MSIMU

Kwende tupikane yigakuti malowe pa Yohane 4:23; *"Nambo tijiciyika ndawi soni jiyice kala, jakuti wandu tacalambila Atati mpela mwawelele ni macili ga Msimu wa Mlungu, tacalambila mwakuwona mpela mwakusosela asyene."*

Pa Aefeso 5:18-19 akuweceta kuti; "...mgumbalilwe ni Msimu Waswela ... Nipo mwajimbile Ambuje nyimbo ni masalimo mwakusangalala m'mitima mwenu"

Kupopela ndi kwimba kwetu komboleka kuwa mwa Msimu (alole 1 Wakolinto 14:14-16). Kupopela ni kwimba mu Msimu kwana ngopolelo ja padela. Yikusagopelela kupopela ni kwimba mu ciweceto cine, ca cilendo, cacikusatyocela kwa Msimu waswela.

Nyimbo kapena lipopelo lisawecetedwa ni malowe gakuti mundu nganalijiganyeje. Cele ciwecetoci cikusawa cangapikanika kwa mundu jwakupopela kapena kwimbajo. Ndawi ni katema soni cangapikanika atamose kwa mundu jwine jwawandicile. Nambo Mlungu akusapikanicisyaga ligongo cityocele kwa Msimu wakwe waswela. Alole 1 Wakolinto 14:2;

"Mundu jwakuweceta ciweceto cacilendo, jwangaweceta ni wandu, nambo ni Mlungu. Pangali mundu jwakusapikanicisyaya yakuweceta jwalakwejo, pakuti msimu Waswela ni wakusamwecetekasyaga jwalakwejo ya mtemela."

Malowe ga Mlungu pa Aloma 8:26 gakutusalila kuti ndawi sine ngatukusamanyilila yatujile pakupopela kapena yatupopelele. Nambo Msimu waswela mpaka apopele kwa Mlungu kupidila mwetuwe malowe kapena ciweceto cakuti ngatukucimanyilila. Malemba gakutusimicisy ka kuti kupopela kwanti myoyo kukusawaga kwakamulana ni lisosa lya Mlungu ndawi syosope.

Ndawi syejinji pakumala kupopela mu Msimu mpaka kukuyicisyekupopela mu ciweceto cetu citwalijiganyisy ni macili gejинji ni mwalunda. Pa 1 Wakolingo 14:14-16 malowe gakukutenda kweleku kupopela ni lunda. Kupopela mu Msimu mpaka kukuyidwe ni kupopela ni lunda (kwakukutendgwa kuti gopolela yiwece ya cilendo)

"Ali ni ligongo lyakwe mundu jwakusaweceta ciweceto cacilendo apopele kuti apegwe mtuka wakuti apakombole kugopolela ciwecetoco" (alole 1 Wakolinto 14:13)

Kupopela mu ciweceto ca cilendo cili cida ca macili mtuka wambone wa Msimu Waswela. Ciweje mbali jakusosekwa ja umi wapopelo getu ga lisiku lililyose. Kwimba mu Msimu mpaka kuwe soni kwakulandana. Ndawi sine ngawa mkomboleka kusala ni malowe yatukusati kwanonyela Ambuje. Pele Msimu waswela ni pakusatupaga malowe ni nyimbo syakumtoglela mu ciweceto cakuti ngatukucimanyilila ni nganisyo syetu

Tukumanyilila mu mitima mwetu kuti kuli gumbalisya kwa cinonyelo, lukondwa ni kumtoglela Mlungu ni kuti akutulimbanganya mu umi wa usimu wetu.(alole 1 Wakolinto 14:2,4,17,18)

Cijiganyo celeci cikutusalila mwa mpaka tukamulicisyé masengo mtuka wa Msimu mu mapopelo getu ga pajika. Pakupopela pajika tukusakola ufulu wekulungwa. Tulilimbanganye mu umi wa usimu nipo Ambuje tasangalale nowe.

Jwandumetume Paulo akuyamicila kwa Mlungu kuti pandawi jakupopela pajika, akusapopelaga mu ciweceto ca cilendo (ciweceto cakupegwa ni Msimu waswela) kupunda jwalijose.(alole 1 Wakolinto 14:18). Aci nditu cili cilandanyo ca macili cakuti wosome m'we tucikuye mu mapopelo getu ga pajikajika!

MTWE WA 3

KUPESYA NI KUSWEJESEDWA

(KUPELEKA MTIMA WAO)

A. AWILASYE KAUNGUNYA.

Pamo ni yiilu tukwenela kupelaka soni mitima jetu. Tukwenela kuwenda ni kuwilasya kuwilasya kuti Ambuje alinje mitima jetu. Pa Masalimo 139:23-24 alembile ni malowe gakuti;

“Andolecesye, w̄alakwe Mlungu, kuti awumanyilile mtima wangu. Alinje une, kuti amanyilile nganisyo syangu. Andolecesye naga ngukuya mata la gangalumbana galigose, ni alongolele mwitala lyawo lyangamala”

Ali nganiliwa lipopelo lya mundu jwakuti pandawi jelejo waliji mu sambi syekulungwa kapena kulepela. Elo Mwanye Daudi wakwete ndawi mpela syesyo. Pa Masalimo 51 wapopelaga mtando wa cikululu ni kuwulaga kuwatesile, ndawi akusajitendaga kuti ‘Salimo ja jwa sambi’ nambo nganijiwa ngani ja sambi pawalembega masalimo 139.

Mu ndime syandanda sya masalimo, mwenye Daudi wawecetaga ya cinonyelo ca Mlungu pa umi wakwe. Akumanyilila kuti Mlungu ali nawo kulikose. Ayimanyi kuti Mlungu wapanganyisyé mwakusimonjesya, ni akwete cakulinga cambone pa umi wakwe. Soni wapelengenyé kuweceta kuti yilanga ya majali ga Mlungu kwa jwalakwe ili mpela msanga

winji wakwe. Akumanyilila ya cinonyelo ca Mlungu cekulungwa, yiyili yakusangalasya kwa jwalakwe mlope.

Masalimo aga gali cilandanyo ca mundu jwakutama mu mkamulano wambone ni Mlungu, nambope akum'wenda Mlungu kuti awulinje mtima wakwe ni kusiwungunya nganisyo syakwe kuti alone naga pana cakusakala cinecakwe cacisisice makati mwakwe cakuti msyenejo ngakucimanyilila.

Masalimoga gakutusalila m'we mu ndime syandanda kuti Mlungu akusatumanyilila m'we mlowe kupunda mwatukulimanyilila wacimisyewe. Kweli cili cindu calunda kuwilasya jwele kawungunyaju; kumkunda kuti Mlungu alanjile malo gakogoya mu umi mwetu gakuti mpaka gayikasye yipwetesi kwetuwe kapena kwa wandu wane.

Panaliji mcanda baba wandu wambaga yindu yakuti ndendeje lyakuweluka lililyose. Gawaga masengo gakusausya ni ndawi syejinji gajigalaga ma awala mcece kuti gamale. Ni ndawi jinejo wangundaga kuti ng'andeje.

Ligulo baba ali awusile kunyumba, walolaga naga yosope yitendekwe cenene. Ndawi sine walanjilaga pa kandumba kane kanganikapyajilidwa cenene. Najigalaga kasace kamwana ni kumalisya masengogo cenene ndawi jijojo.

Ngawa kuti babawa wandagasyaga. Wagambaga kujiganya kutenda masengo cenene ndawi jandanda pejo. Naga ndesile masengogo cenene, wawaga wakosece kuweceta kuti: 'mtesile cenene mwanangu.' Yacimanicile kuti cijuma ca malawi patimbyajileje, tinjipyajila malo gosope gakusisika cenenepe, malo gakuti pandanda pala nganinagawona.

Nganguweceta mwa kunyosya nambo pana wandu wane wakamwile mu yitendo ya sambi yakuti ngakumanyilila cenene. Pambesi tacigowola yakupanda. Yakuyicisa ya sambi syao yiciwa yipwetesi ni cilango pa ndawi jinejakwe. Ni taciwa wakusimonga; 'ligongo cici yeleyi yisimene une?'

Acimlongosi wa mu mpingo akusajonanga ndawi jejinji pakusaka kwakamucisa wandu ni yakusausya yakuti yikutyocela mu sambi syao syakusisika. Akusawa ali mkuganisa, kuweceta, yindu yacabe ni wangayimanyilila kose.

Apali wa mnono wakusaweceta kuti; 'nganisisye kuti namlece Mlungu ni ndande kutama umi wa sambi' ndawi syejinji akusayika ali akumudwe ni kuwlala mu mtima mwao ligongo ngakumanyilila yatajile pakwenda ni Yesu kapena kupikana malowe gakwe.

Naga tuli twawendile Ambuje kuti atulosye sambi syetu syakusisika, taciweceta nowe, ni kutukamucisa kupyajila cenene ndumba jilijose ja umi wetu.

Patukupikanila malowe gakwe ni kusosa kutenda yakuweceta, tucilijiganya kwenda ciwandika najo lisiku lililyose. Ni naga ligulo lili mkuwandicila, m'we soni komboleka kumpikana ali

mkuti; ‘ galiji masengo gambone lelo mwanangu, ngusangalala nomwe’ kupikana gele malowega cili cindu ca penani mlope!

B. AKASALAMBUSIDWA

Kulambusidwa kuli kulupilila kuti cindu cili cambone nambo cili cakusakala. Pa 1 Yohane 1:7-10 akusalila kuti naga tukupelenganya kwenda mu lilanguka lya cinonyelo ndi cisyesyene ca Mlungu, myasi ja Yesu jikusatuswejesya m’we ku sambi syosope. Soni gakusaweceta kuti;

“ Nambo naga tukwiticisya ulemwa wetu, Mlungu jwali jwakulupicika ni jwakulungama, tacitukululucila ulemwa wetuwo. Tacituswejesya ni kututyocesa ungalumbana wetu wosope.”

Aji nditu jili ndime jakuweceta yakusalala.

1. Malo Gatatu Ga Mpaka Tulambusidwe

Kutyocela pelepa tukusalola kuti pana malo gatatu ga mpaka tulambusidwe:

- a. **Nganitukola Sambi.** Ganisa kuti nganikola sambi syakuti atukululucile
- b. **Ngatukwenela Kupesy.** Ganisa kuti naga tulemwisy, Mlungu ngayiwalanjila kapena tagambe kutukululucila atamose ngatukwiticisya ni kumsalila ya sambi syetusyo.
- c. **Ngatukululucidwa.** Ganisa kuti ngatukululucidwa, kapena ngasatukulucila atamose tuli tupesisye sambi syetu.

2. Cinyengo Cikusajonanga Mkamulano

Naga tulambusidwe mbali jimo pa yitusasileyi, mkamulano wetu, (kwenda ni kuweceta ni Mlungu) kukusajonasika. Tuciyiwona yakusausya kupopela, kutogolela kapena kumlambilila Mlungu.

Malowe ga Mlungu gangatupa lukondwa ni mtendele wutwakolaga kala mkugapikanamo. Kuciwa kwakusausya kwetuwe kuti tuwonagane pameso ni Ambuje. Komboleka kulinga kulosya kuti yosope yili cenene nambo mkatì mwa mitima jetu tukusamanyilila kuti yindu nganiyiwa cenene.

a. Mitima jakupweteka.

Wandu wakusaganisa kuti wangalemwa, akusapelenganya kusimana ni yakusausya mtando wa sambi syao. Nambo wangamanyilila ligongo cici akusasimana ni yakusausyayo – kapena ligongo cici akusapikana kupweteka mmitima mwao.

b. Mitima Jakulimba

Wandu wakusalemwa nambo wangayiwona kuti yakusoseka kumsalila Mlungu, ligongo tiwakulucile pe, mpaka akole mitima jakulimba. Pakumala kandawi ngasapikana soni Ambuje ali mkwatetela. Kwenda mwakutalingana ni Ambuje cili cindu cakogoya. Ana cici caliji cakusausya ca a Falisi? Tulole Yohane 9:40,41;

“Afalisi wîwam’wandicile Yesu wampikene jwalakwe ali mkuâweceta yeleyi nipo wamwusisye kuti, “Ana yakuwona wawo akugopolela kuti uwe soni tuli wângalola?” Yesu wajanjile kuti, “Yikâwe kuti jemanja ali wângalola, ngamkinakola ulemwa kose, nambo pakuwapo akulitenda kuti akupakombola kulola, yikwamba kugopolela kuti jemanja ali ciwela mu ulemwa mwawo.”

Afaliliwa walambusidwe ni nganayililaga, pa ligongo lyelelo sambi syao syaliji ciwela.

c. Mitima Ja Usito

Wandu wakusayiwona kuti atamose amsalile Mlungu sambi syao, ngasiwakululucila ni kuliwalila, tacikola mtima wa usito ndawi syosope. Ndawi syosope akusawa ali mkulitendela canasa ni kulijamuka ligongo lya sambi syao.

Kuli kwambone nditu kuwa wagopoka ni wakuwona ndawi syosope kwiticisa kuti tukusagwaga ni kulepela. Mlungu ali jwakoseka ndawi syosope kutukululucila, kutupa soni upile wine ni kutulimbanganya. Ni akusaka soni kuti tujendeje penani ni kupundanganya pakugwa kulikose ni sambi.

Kuti tujende mwakupundanganya mu sambi, tukwenela kwika kwa Mlungu pa ndawi ji nganituwe kutenda sambisyos. Kuli kwangasausya kwaaula kwa Mlungu nganitulemwe kulekangana tuli tulemwinye.

3. Awe Wakupikanila Kwa Msimu Waswela

Mu mapopelo getu ga kundai komboleka kwasalila Ambuje kuti ngatukusaka kuti tulambusidwe mu lyele lisikuli. Tukusacilila kuti tujende mu lilanguka lya cinonyelo ni cakuwona cao. Tukusaka kumanyilila ni kupikana kusimanikwa kwakwe ni m’we ndawi syosope. Mu litala lyeleli mpaka tumtumicile ni kumpikanila ni lukondwa lwa mu mtima.

Tum’wendeje Mlungu lisiku lililyose kuti atutende tuwe wakupikanila kwa Msimu waswela, ligongo jwalakwe ni jwa mpaka atutetele naga tuli pa ngosi. Soni mpaka atusalile mwa citema naga tulemwecesye cinonyelo ni cakuwona cakwe.

Ngukulupilila kuti wosome tukumanyilila kuti na tumkudwisye Mlungu musi, ngayigopolela kuti tujasile **cikulupusyo** cetu, nambo sambi atamose jinandipe catimti uli jikusajonanga **unakajumo** (Kuwecetana ni kajende) wetu ni Mlungu.

Tukusosekwa kuwaga wakoseka ndawi syosope kum’wenda kuti atukululucile ligongo ngatukusaka kuti unakajumo wetu ni Mlungu ujonasice. Tukusaka tusangalasye Ambuje mu yindu yosome ni tukamlemwecesya mu kalikose.

C. AWICE MLONDA PA NGANISYO NI PAKAMWA PAWO.

Pa Masalimo 19:14 tukusapikana ya mwenye Daudi kuti watite:

“Malôwe gangu ni nganisyo syangu~yijiticisidwe pameso pavo, Walakwe Ambuje, ali lwala lwangu~ni mkulupusyo jwangu”

Mundu jwine watite atamose ngawa mkomboleka kulekasya yijuni penani pa mitwe jetu, nambo mpaka tuyilekasye kutawa yisusi mmitwe mwetu.

1. Kuwika Mlonga Pa Nganisyo Syao.

a. Malo Gatatu Gasikusatyocela Nganisyo

Nganisyo ni yakulinjidwa yikusayika kwetuwe kutyocela ku malo gakulekangana lekangana, nambo gapali gatatu gekulungwa kulungwa.

- 1) Cilambo – Kutyocela ku yindu yatukusayiwona ni kuyipikana
- 2) Cilu – Ndamilo syetu syakusaka yakusakala
- 3) Satana – Ya ku misimu

Nambo naga nganisyo siyice kwetuwe ngayigopolela kuti tusiganicisy. Nganisyo syakusakala naga ngasikana, sikusatuausya ku yiwceto yakusakala ni yitendo yakusakala. Ni tukwenela kuyilekasya mwacitema ni mmalo mwakwe kutanda ganicisy yindu yeswela.

b. Amtende Yesu Kuwa Mbuje Jwa Nganisyo Syao.

Komboleka kutanda lisiku lilyose ni kwawenda Mlungu kuti asunje nganisyo syetu. Naga nganisyo syakusakala siyice, tatumanyisye ndawi jijojo. Litala limo lyangasausya lyakulekacisa nganisyo syakusakala ni kuweceta kuti: “Ambuje, wao soni akusiwona asi nganisyosi, ni ngatusipa soni ndawi jine kapena kusiganicisy, ngawa Myoyo?”

Kuweceta kwa Yesu kukwete macili gekulungwa gakulekasya nganisyo sya cabe. Cilu cetu cikupikanilaga. Yalakweyi yikusatukamucisya ngasiganicisy nganisyoso kapena kutanda kuligamba ni kulijamuka

Mklistu jwalijose tacikola nganisya sya cabe pa ndawi jine jakwe, nambo Yesu mpaka awe Ambuje wa nganisyo ni mitima jetu.

2. Kuwika Mlonda Pakamwa Pawo.

Pa Miyambo 18:21 akuweceta kuti:

“Lulumi lukwete macili ga pa umi nambo soni ciwa...”

a. Malowe Gakwete Macili

Tukwenela kulolecesya yatukuweceta. Malowe gakwete ngopolelo ndi macili pakwanilisya yambone kapena yakusakala. Mpaka gapwetece kapena kulamisya. Mpaka gapelece likondwa kapena lutumbilo. Mpaka gatawe kapena gumula. Mpaka gapelece cinonyelo kapena woga, gamba kuti umi kapena ciwa!

Ndawi sine malowe gakusakola yakuyicisya ya mwana pakonjecesya gamba kwasa ndawi. Pa Matayo 12:36 akuweceta kuti;

“Ngumsalicisya kuti pa lisiku lyakulamula, wāndu tacijimbidwa magambo ligongo lya malōwe galigose gangalumbana gimwaŵecete”

Ndawi jili umi, nipo konanga ndawi kuli konanga umi.

b. Amanyilile Ndawi Jakuweceta

wosope wene pakwete ndawi jine jakuti Ambuje watutetele ligongo lya malowe getu. Mwine twatiga tuwecete cine cakwe Ambuje ni watite; “Mkasim’weceta, ngayikusosekwa sano jino.” Mwine nganitumanyililaga pa ndawijo kusosekwa kwakwe kwangaweceta. Nambo Mlunu wayimani!

Ndawi sine Mlunu akusatusalilaga kuti tuwecete. Awisile cine cakwe mu mtima mwetu kutyocela mu mtima mwakwe, ni akusaka wandu kuti apikane malowe gakwe. Jele ni ndawi jakuweceta mwa cikulupi. Malowe gakutyocela kwa Ambuje gakusapeleka umi ndawi syosope!

Pakutanda ni kuweceta ni Mlunu kundawi kwa lisiku lililyose yitukamucisye kupikana malowe gakwe lisiku lyosome. Ali lili ligongo lyambone lyakutamilisya ndamilo jakola ndawi jakupopela kundawi kulikose.

D. ALOLEJE M’BUJO

Mu buku ja Afilipo 3:13-14 akuweceta kuti;

“Acimjangu ngangulitenda kose kuti mwajikape nayikamwile kalape, nambo cindu cimope cangucitenda ngusaliwalila ya munyuma, ni kulinga kwicila ya pawujo. Ngwanguya mkuwutucila kumbesi ja makani ga luwilo, melepe kuti ngapocele mbote jele Mlunu jakumbilanjila mwa Klisto Yesu.”

Kuti mundu ukayicile yakulinga ya pa mbesi cenenepe ukwenela kutenda cenenepe yakulinga ya lelo jino. Lisiku lililyose Mlunu akusasaka kuti tukwanilisye cindu cine cakwe. Pana tumasengo twamwana takusaka kuti tutende.

Mu mapopelo getu ga kundawi Mlunu tatupe yindu yejinji mu nganisyo mwetu yakusaka kuti tutende. Naga tukwanilisye atu tumasengo twamwanamwanatu mwa cikulupi ni kupikanila, nikuti tuwutucile pa wujo

Lisiku lililyose mu ndawi ja mapopelo getu, tupeleceje kwa Mlungu umi ni lisiku lyakwe. Tupopeleje kuti tuyicile pa wujo atamose tuli tusimene ni yamtı uli. Ngasitupela mu kulinga kwetu pakutenda lisosa lya Mlungu.

Naga tuyicile lisosa lyetu mwa Mlungu. Tucipocela mbote jetu ja kwinani. Ayice sambano, kwende tulikomasye lisiku lililyose mwa cikulupi, cembeceyo ni kulimbika mwa Yesu Klstu!

MTWE WA 4

DONGOSOLO NI KUPIKANILA

(KULIPELEKA LISIKU LYAO)

A. APELECE LISIKU LYAO KWA MLUNGU

Malowe pa Masalimo 37:5,7 gakuweceta kuti;

“5 Mlipelece mwasyene kwa Ambuje, mwakulupilile ūelewo, nipo tacimsamalila... Tamani jii ni kwalindilila Ambuje mwangadandawula; ...”

Malowe gawiliga “**mlipelece**” ni “**tamani jii kwalindilila Ambuje**” gali gakusosekwa mlope. Gakusapanganya litanga lya usimu lyakusaptila mu kwenda ni Ambuje lisiku lililyose.

Pakupeleka kwa Mlungu yindu yosope yakuti ngakombola kucenga ni macili gao ni kwajembecela Ambuje ni kusimicisa kosope kuti “Mlungu akusayitenda yindu yosope kuwa yambone kwetuwe” (Aloma 8:28)

M’we wangamsalila Mlungu yakutenda.

Ayice kwa Am buje lisiku lililyose ni ajile, “Ambuje ngusaka kuweceta ni wao yakwamba lelo.” Kaneko ni amsalile Yesu yayikwakwaya wao. Alisale lisiku lyao kwa jwalakwe, asale cimo cimo – wandu wasasimane nao, malo gatajaule, yindu yitatende, yisagula ni yine yosope.

Pakusawa pana yatukusasimana nao yakuti ngatukwembecela, ni ligongo lyakwe ngatukusamalisa yosope yatusosileje kutenda. Mowa gane, yosope yatusacileje kutenda yangakomboleka. Ni tukusakumudwa ni kuliwona kulepela. Mowa gayikulepeleka yitukusaka gakusawa ga kupweteka.

Nayiweni pali papite ndawi mowa gagawonekaga mpela gangapindula galiji gakupindula mlope, kupunda munaganicisyaga. Cili cakulimbisia mtima kumanyilila kuti Mlungu jwangasipuka ni yindu yakutendekwa mwangajembecela. Yitukusaka ni yakulinga yetu komboleka kulepeleka , nambo ya Mlungu yangalepeleka. Pangali citiciwa cejonasice kwakumalilwa naga tupelece umi wetu ni lisiku lyetu kwa Ambuje kundawi kulikose.

Pana masiku gakuti nganingola ndawi jakupopela kundawi. Nalepele kulipeleka lisiku lyangu kwa Ambuje. Naliji pa citema kwaula **kukamula masengo ga Ambuje** mwakuti nganingola ndawi jwakwembecela pa **Ambuje wa masengogo**. Ndawi syejinji naga ndile ndesile myiyi, pajikusakwana 10:30 kapena 11:00, lisiku lwangu likusawa lisokonecele. Pangali cingusaciwona cenene, mu mtwe mwangu mukusawa mwana cinampwilikit. Ana pakwete pagaweni mowa mpela gelaga?

Komboleka kusimana ni yakusausya ndawi jine jilijose, nambo naga uli ulipelece lisikulyo kwa Mlungu ukusawaga uli ukosece ni macili ga usimu. Kulipeleka lisiku kwa Ambuje kukusakupa cikulupi kuti Ambuje takulongolele mwalunda mu yakusausya yiliyose ya mpaka yiyice mwangajembecela. Pakusawa pana kulekangana ku lisiku lyaulipelece ni lyanganiwupeleka kwa Mlungu – kulekangana kwakwe kwekulungwa.

Nguyamika kuti citengu ca cisuwelo ca Mlungu, cilidi ca cisuwelo, ngawa ca camuko. Cili cakusangalasya soni kuti komboleka kwika kwa jwalakwe atamose ni kulepela kwetu, ni ali jwakoseka kutukulucila ni kutukamucisya.

Pana ndawi syakuti komboleka nganiwukola ndawi jakulipeleka lisiku, ni lisiku lyakwe lisonecele ligongo lyangapopela, nambo naga utindiwele ni kuwenda kuti Mlungu akukamucisyne ni kukupa lunda akusakujangaga. Ni atamose walepele kwembecela pa Mlungu, Mlungu akusawa ali mkukujembecelape.

Yangakomboleka kucelewa kupopela, nambo mpaka tunandiye yisausyo yetu ni yawe naga tuli tupopesile kundawipe. Jele ndi ndawi jakulipeleka lisiku lyetu kwa Mlungu – kaneko ni tujembeceleje pa Jwalakwe.

B. ALOSYE KUDALILA KWA MWANACE

Malowe ga Mlungu pa Miyambo 3:6-7 gakuweceta kuti;

“Myindu yosope yamkusitenda, mkumbucileje kwiticisyu kuti kusa kuno kwana Mlungu, jwalakwejo ni jutacigagolosya matala genu. Mkasimganisyaga mwasyene kuti mli wa lunda kupundanganya ni mumwelele, mwajogopeje AMBUJE soni myiambaleje yindu yakusakala, ngayitenda”

Ngusaka amanyilila kusosekwa kwakwe kola kudalila mpela mwakusatendela mwanace. Mpela mwanace mwakusasosela babagwe, m'we soni tukusosa Mlungu. Tuli wakudalila pa jwalakwejo kwambumbu. Tukusamsosaga mlope lisiku lililyose. Kuliganicisyu wasyegwe kuwa jwa lunda kuli kuwa jwakulikwesya ni jwangapikana ya wane – kuliwona tuli wakombola – kuti mpaka tutende yindu mwangakamucisidwa ni Mlungu.

Elo komboleka kuya ndondomeko ja mpingo, nambo tumanyilile kuti wandu komboleka wandu kwika ku mpingo ni ngasimana ni Mlungu. Kupunda kwa mwambo wa mpingo kukusajimila naga wandu asimwene ni macili ga Mlungu kuitila mwa Msimu wakwe. M'we ndawi syosope tujegamileje pa jwalakwe. Aku ni kudalila kwanti mpela kwa mwanace

kwatukwenela kola ndawi syosope. Kwende tусyasye yiwatite kupopela mwenye Daudi pa Masalimo 86:1;

“Ambikane une, wālakwe Ambuje, ni anjanje, pakuŵa une jwakulaga ni jwangali cingwete”

C. AWENDE CILONGOSYO CISYESYENE

Malowe ga Mlungu pa masalimo 25:4,5 gakuti;

“Amanyisye mata la gawo, wālakwe Ambuje, anjiganye une kukuya lisosa lyawo. Anongolele ni kunjiganya mu yakuwona yawo, pakuŵa wālakwe ali Mlungu wākungulupusya une, ngusajegamila pa wālakwe masiku gosome.”

Ngusapeleka lisiku lyangu kwa Mlungu pakuweceta kuti “Atati mu lisiku lyosope lelo jino tinjembeceleje pa wao. Alosye litala lyao. Ajiganye une kukuya lisosa lyao.” Ngusinam’wenda Mlungu kuti alongolele mu yindu yakulekangana lekangana.

Ni naga ndili mkusimana ni yindu yina mu lisikulyo, ngusaweceta kwa jwalakwe kuti; “angamucisye Ambuje” pakutenda myoyo kundawi ngusawa mpela ngulikumbusya yinawendile kundawi kula. Pana ndawi sine nasasakaga kuweceta cindu cinecakwe nambo na pikanaga kulekasidwa mu msimu wangu, Msimu wa Mlungu ali mkukusalila kuti mkasim’weceta celeco, ngawa kuti cili ca sambi kapena ca unami, nambo nganiciwa cakwenela pa jele ndawijo. Ni natite elo nayimanyi kuti nganiciwa cakwenela nambo timbecete pe. Ngawa kuti tiyimpwetece jwine jwakwe. “mkasim’weceta, ndite mkasim’weceta”

Ndawi ngatukusawalanjila kapena kupikanila Mlungu ali mkuṭulekasya, ni kutenda yitukusaka. Yituganisisye yangali kandu yikusawa cindu cakupweteka kwa jwine. Kaneko tukusalindela canasa kuti nganitupikanila malowe ga Msimu waswela mu patulekasisye mu mtima mwetu. Atamose ili yimanikwe kuti malowe getu nganigampweteka jwalijose nambo ngatukusakola mtendele kuti tuwecetepe pakusaka kwanilisy cilakolako cetu cakuweceta.

Mu cilandanyo ca panani ci nganimbeceta ni namikene kuyamila kwa Msimu waswela mu mtima mwangu. Cili cindu cakusangalasya kumanyilila kuti Mlungu akusangalala nowe naga tuli mkumpikanila. Mtwe wakusoseka kulijiganya ni wakuti: kukombola kuligosa kukusatycela mu mapopelo getu ga kundawi. Tukusalipelekaga lisiku lyetu kwa Mlungu ni kupopela mpela pa Masalimo 19 :14 kuti:

“Malōŵe gangu ni nganisyo syangu yijiticisidwe pameso pawo, Wālakwe Ambuje, ali Iwala Iwangu ni mkulupusyo jwangu.”

Naga tuli twawendile Ambuje cilongosyos cisyesyene mu kutanda kwa lisiku, tatulongolele mu yindu yosope yatiywone mu lisiku lyosope.

D. ATENDE YASALILIDWE.

Yesu akusalicisa kuti Atati wetu wa kwinani tacitupa yosope yatukusowa. Kwene tulole Mateyu 6:26:32

"26 Mbole yijuni ya mwinani: yangapanda, yangagowola mbeju kapena kututa ni kuja kutaga mu ngokwe. Nambope Atati wenu wa kwinani akusayipaga yakulya. Nambi jemanja, ana nganimwa wakusosekwa mnope kuyipunda yijuniyo? Ana wanî mwa jemanja ni nganisyo syakudandawula mpaka apakombole konjecesyatamose lisiku limpepe pa umi wakwe?"

"Nambi mkusadandawulilaga cici ni yakuwala? Mbole maluwa gakwitinji mugakukulila. Gangakamula masengo kapena kulipanganyicisa nguwo. Nambotu ngumsalicisa kuti atamose Mwenye Solomoni jwene juwaliji jwakusicila mnope, nganawalaga yakusalala kulandanicisa ni limo lya maluwaga. Mlungu ni jwakusagaweca camti myoyo manyasi gakwitinji, gele gakwamba kutama lelo pejino, malawi gano ni kuponyedwa pa moto, nambi kwa jemanja, ana mpaka alepele kum'weca? Ana ligongo cici cikulupi cenu cikunandipa?"

"Myoyo mkadandawulaga mciganisyaga kuti 'Ana tindye, timwe kapena timbwale cici?' Pakuti wändu wakusa ni wakusayisosa mnope yeleyi. Nambotu Atati wenu wa kwinani akusamanyilila kuti mkuyisowâ yindu yeleyi."

Ngatukwenela kudandaula ya yatuciwala kapena kulya. Mpela mwakusatendela Atati wetu wa kwinani pakusamalila tujuni twamwana ni maluwa ga mwitinji, mwakupunda mlope akusatusamalila ni tacitupa yatukusowa.

Ana tukusagamba kutamba kutama ngatenda kalikose ni kwembelega kuti tatupe yatukusowa? Kapena pa cine cakwe catukwenela kutenda kuti tusangalale yakutupa? Mu malemba akusajanga mausyo gelega. Mlungu ngakwanilisa malemba gakwe naga m'we ngatukutenda yatulamulile.

Baibuli jiwceta kuti: "... mwende nipo Mlungu tacimpa yimkusaka, ... Pandawi jimkupopela mjileje myi: ... Atupe uwe lelo yakulya yetu ya lelo. (aloole Luka 11:9, Mateyu 6:9,11)

Aci cili cangasausya Mlungu akusosa kuti tuwende ni tucipocela, tukasitudandaula, nambo tuwende! Ana pelepa Mlungu akuweceta naga ngatukupopela nikuti ngasitupocela? Elo! Mu buku ja Yokobo 4:2, Mlungu akuweceta kuti: "Pakuti jemanja wangamwenda Mlungu, ni ligongo lyakwe nganimkola"

Cikulupusya cili cilandanyo cambone. Cili ca wosome soni ca mpaka kalakala – nambo awo pewo wakusawenda ni wakusapocela. Tukusapocela mtuka wa umi wangamala naga tuli tum'wendile Yesu kut ayice mu umi wetu ni kuwa Ambuje ni mkulupusyo jwetu. Nambo tukwenela kuwenda.

Cakuwona cicici cikwamba ya umi wa lisiku lililyose ni yakusowa yetu. Tukwenela kum'wenda Mlungu cakulya cetu ca lisiku ni lisiku. Ayi yigopolela ya yindu yatukuyisosa pa umi wetu wa cilu ndi wa usimu wakwe.

Yesu pa buku ja Yohane 4:34 waweceta kuti: “*Yakulya yangu ni kupikanila yakusosa ūele ūiwanumile une ni kumalisya kutenda masengo giwambele*”

Ana yeleyi yigopolela cici? Mpela mujikasamalila sala ja ku cilu pakulya ca kulya, sala ja mu usimu ni mu mtima jikusamala pakutenda lisosa lya Mlungu. Mpaka tutende lisosa lya Mlungu naga tuli tulimanyi.

Atati wetu akwete cakulinga ni m'we lisiku lililyose, cele cakulingaci tukusacimanyilila ndawi jitukupopela kundawi kulikose. Lisosa lyakwe liciwa cakulya cetu ca lisiku lililyose.

Litala lyakumanyilila lisosa lya Mlungu ni kuwenda lisiku lililyose. Ngayigopolela kuti Mlungu tatusalile yosope yatiywonece mu lisiku lyetu. Yikugopolela kuti patilimaleje lisiku, lisosa lya Mlungu pa kwa wao pa lisikulyo tiliwe likwanile – naga wawendile kuti lisosa lyakwe litendekwe mu umi wao lisiku mkaniliwe kutanda.

Komboleka nganiliwa lisosa lya, nambo komboleka kuwa lisosa lya Mlungu. Mlungu talinge yosope kuti yikwanilisyé yakulinga yakwe yambone kwetuwe mwa Yesu Khlistu. Lisosa lyakwe kwetuwe ni lyakuti tulandane ni Mwanace Jwace. Pangali cakwasika, soni pangali cakonasika. Alole Aloma 8:28,29.

Komboleka kuti wawojo ngamanyilila kuti yekulungwa ya lisosa lya Mlungu yitendekwe mu lisiku line lyakwe. Kwa wao komboleka koneka mpela limo mwa masiku gangapindula gatuwecete gala.

Nambo alolele kwa Mlungu ka kandawi kuti ayikasye yisogosi. Komboleka kujigala cijuma cimo kapena caka, komboleka soni ata litika lya umi wosome. Nambo jiciyika ndawi jakuti wosome tuciwceta kuti “ Yesu walongolele ndawi josome”

Alipelece lisiku lililyose kwa Mlungu ni umi wao wakwe. Alilongosole lisiku lyosome kwa Mlungu. Mwa lukondwa am'wende Mlungu cakulya cao ca lelo ni lisosa lyakwe kwa wao – ni awe pa mtendele!

MTWE WA 5

LIWASA NI MPINGO

(KWAPELEKA WAPANTIMA NI WAKUNONYELWA)

A. WASALE WA MU LIWASA LYAO MENA.

“1 Ku cilambo ca Usi kwapali mundu lina lyakwe Yobu, jwalakweju jwaliji jwangalemwa soni jwaliji jwakulungama pakuti wampikanilaga Mlungu ni kuliwambasya ku mata la gakusakala. 2 Yobu wakwete wanace wacalume msano ni waâwili ni wacakongwe watatu. 3 Jwalakwejo wakwete ngondolo 7,000, ngamila 3,000, ng’ombe 5,000, ni acibulu 5,000. Wakwete soni wando wamasengo wajinji pakuti waliji jwakusicila mnope kwapunda wando wosope wa ku yilambo ya ku ngopoko lyuâwa.

4 Wanace wa Yobu wacalume watendaga cindimba mwakucenganacengana, lisiku line kwa jwine lisiku line kwa jwine. Piwatendaga yindimba yawoyo wâvîlangaga acalumbu wawo watatu wala. 5 Gali gamasile masiku ga cindimba, Yobu wajimukaga kundâwi kulikose nipo wampelecelaga mbopesi mwanace jwakwe jwalijose ni cakulinga cakuti wanacewo lyatyoce likungu. Watendaga yeleyi ligongo waganisyaga kuti mwine mwakwe wane mwa wanace wa Yobuwo alemwisye pakumtukana Mlungu mwamele.”

Tuwcete yakulipeleka wao asyene, mtima wao ni lisiku lyao kwa Ambuje. Sano tukusaka tuwceta yakupeleka wandu wali ciwandika ni wao – wandu wapamtima ni wakusiwanonyela. Tukuwceta ya wandu wakuti yindu yao yikusitukwaya. Welewa ni mawasa getu, acimijetu, acalongo acimijetu mwa Yesu, wakuti tukusawa nao yimo ndawi syejinji.

Mu mapopelo gejinji ngangusatendaga, aga ni gagakusigangwaya mlope mu mtima. Tukwenela kwapopelela wandu wali mu liwasa lyetu pa kwasala lina lisiku lililyose. Ayi ni yiwatendaga Yobu. Jaliji ndamilo jakwe kwajigalila wanace wakwe pameso pa Mlungu mu mapopelo. Waliji wakwayidwa mlope ni mkamulano wao ni Mlungu.

Akwenela kuwa wakwayidwa ni ya anganga wao, acinangolo wao, wamkwawo, wanace wao ni yisukulu yao, naga akwete wandu wanti myoyo mwiwasa mwao. Atamose kuti akusatama jika pana nditu wandu wane wakwe wakuti akusakulana nawo. Komboleka kuwa nganawa wakugwa nao nambo akusamanyigana mlope mwakuti akusiwaona mpela acalongo acimijawo. Pele ni patukusandila, wasale mena gawo mu mapopelo lisiku lililyose. Ngusaka kwasalila jemanja ma umboni gawili ga pa ngani ja lipopelo lya liwasa.

1. Lipopelo Lya Baba Wangu.

Umboni wandanda uli wa baba wangu. Baba wangu wawile mcaka ca 1979 nambo ngusakumbucilaga yindu yekulungwa yiwatesile. Tukwete mteto wine wakwe wakuti lisiku limo pa caka cilicose tukusakola lisiku lyakum' yamika Mlungu pa yosope yambone yatutendele. Ali likusawa lisiku lya padela kwa liwasa lyetu. Wamkwangu ni une tukusawila wandu wosope ku nyumba jetu kuti tulile pamo. Jikusawa ndawi ja lukondwa ni, unakajumo ni kuyamika kwa Mlungu. Waliwose akusakola jakusala yiwatendele Mlungu pakuyamika mu cele cakaco. Pangali wawamanyililaga kuti 1979 ciwe caka cakumalisya kuwa yimo ni baba. Wasasile kuti waliji wakusangalala kuti m'we wosope wanace wao twaliji mkumtumicila Mlungu ni kuti mawasa getu galiji gejaliwe.

Kaneko baba wawecete cinacakwe cakuti ngasinaciliwalila "ngusinapolela wanace wangu wosope kasanu ni kawili pa lisiku" sano ngumanyilila kuti baba wapopelaga. Waliji mundu jwambone ni jwakumjogopa Mlungu. Nambo nganimanyililaga kuti wapopelaga kasanu ni kawili pa lisiku.

Nganguganisya kuti watindiwalaga ndawi syosope siwapopelagasi, nambo wakwete ndawi syakupopela mu mtima mwao.....

Mpingo wetu uli wejaliwe mlope ligongo baba ni mama waliji wandu wakupopela. Lelo jino, m'we tukugowola yisogosi ya masengo gawo. Kwende aci cilandanyo ca m'we wosope.

Wapopelele wanace wao ndawi syosope. Pangali cindu cine cambone ca mpaka walecele kupunda celeci.

2. Kupopelela Liwasa Lyangu.

Cindu cawili cingusaka kwasalila ni yangusati pa kupopelel a liwasa lyangu. Ngusatanda ni kwapopelela wankwangu kuti: "Ambuje ngwawenda kuti wajaliwe wamkwangu wa pa mtima." Kaneko ni ngusapopelela yakusausya yine ni upile wa utumiki wungumanyilila kuti tasimane nayo mu lyele lisikuli. Ngangusajigala ndawi jelewu nambo ngusapopela mwakulupicika lisiku lililyose.

Ngukulupilila kuti mapopelo ni gagatendekasisye liwasa lyetu lya yaka sate kuti liwe lyejaliwe mlope. nganguti nganitukoleje ndawi ja yakusausya sikati jetu iyayi. Twakoleje , nambo twalijiganyisye kukula mwa Ambuje kultipila mu syele ndawisyo. Kupopela lisiku lililyose kukusalimbanya ulombela pameso pa Mlungu mwakusalala ni mwamacili. Wapopelele wamkwao.

Kaneko ngusina mpopelela mwanace jwangu jwamkongwe jwamkulungwa ni wamkwakwe. Jemanjawa ali gulu ja acimlongosi mu mpingo wetu. Lili liwasa lyambone ni lyakumnonyela Mlungu. Nambo yindu yambone mpele yeleyi yangagamba kutendekwa. Mlungu akusayitendaga naga m'we acinangolo tukupopela mwakulupicika. Kaneko ngusinapopelela

wanace wangu wosome wakutenda yindu yakulekangalekangana mwakulongoledwa ni Mlungu.

Uli upile ndi udingo wekulungwa watukwete wosome m'we wakupopelela wandu wa pamtima wetu wawawisile Mlungu mu liwasa lyetu.

B. AGANICISYE LIWASA LYEKULUNGWA

“...nambo soni mkalepelaga kwakamucisya ḫa paulongo ḫenu.” (Yesaya 58:7)

Yaka 15 yipiteyo nganimanyililaga yijagopoleлага ndimeji pawajiwisile Ambuje Mlungu mu mtima mwangu. Wasalile kuti ndime josome ja 58 ja Yesaya jiciwa jakupikanika cenene mu utumiki wa m'bujo. Napikanicisyе kuti wa paulongo penu akugopolela wacinasi wetu kupunda wandu mu liwasa lyetu. Lili liwasa lyekulungwa; kwa une likusagamba mpingo baba wakongwe ni wanace wao. Kala nganinapopeleлага. Ata kwaganicisyе iyayi. Sampano peji ni jindandite kwapopelela.

Wamkwangu akutyocela mu liwasa lya wandu msano ni mcece. Ku jele mbalijo ngwete mtundu yipwa ni yisukulu yawkana 25. Wajinji nganinamanyililaga mena. Soni nganinapopeleлага.

Nakulupililaga kuti nalombile wamkwangu, ngawaga liwasa lyao. Waliji wambone kwa une ndawi sine kwa une, nambo nasangalalaga kutama jika ni wamkwangu. Ngawa kuti nawengaga, nambo nganisakaga kuti jwine asausye. Mkamulano wetu waliji wa ume, wakusamalila nambo wakutalikangana

Mu yaka ya ndanda ya ulombela wetu, Mlungu watandite kuweceta ni une pa yangusati kwaona acalongo acimjangu, nganinjenelaga kulisia kwa acalongo acimjangu.

Cinonyelo cikusajigala udindo wekulungwa wakupopelela wacilongo wa mbali jine ligongo lya ulombela. Mlungu wangamucisye mwakuti ngangwamba kulijiganya mena ga wacilongowa nambo soni kwapopelela.

Sano ngawa ngusinapopelela lisiku lililyose mpela wandu wali mu liwasa lyangu, nambo ngusatenda myoy o cijuma cilicose. Pakutenda myoyo nikuti ngambela ni kusitopelwa ni udindo wakuti Mlungu nganandwika. Ngangumanyilila yisyesyene yakusimana nayo ni kuli kwakusausya kuti saleje yalakweyo mu mapopelo gangu. Nambo ngusinakumbucila mu mapopelo gangu pameso pa Mlungu. Ni Msimu waswela akusapopela kupitila mwa une mmalo mwao. Naga jwine jwakwe ali mkusosa cikamucisyo cine cakwe mwacitema, ngusawa jwakoseka ni jwakupikanila kwa Msimu waswela kuti mbopelele calakweco.

Mu litala lyeleli umi wangu wa mapopelo ukusawa wangapesya ni wamacili ni ukusawa wakamucisya mlope ku liwasa lyetu lyekulungwa.

C. AKUMBUCILE LIWASA LYA ATATI.

“Ni ligongo lyakwe sambano ngwatindiwalila Atati, ḫe le liwasa lililyose lya kwinani ni pasi pano likisakolanjidwa ni lina lyawo” (Aefeso 3:14-15)

Liwasa lya Atati uli mpingo. Ana mpingo tukusaupopelelag a canti uli? Candanda tukusapopelela wandu wali mu mpingowo.

Aku kuli kwelekangane ni kupopelela ni yakutendekwa pa mpingowo. Elo yili yakusosekwa ni tukwenela kuyipopelela. Nambo naga pangali wandu ngasitukola yakutendekwa yiliyose. Ni kuli kwakusosekwa kupopelela wandu wa mu mpingo.

Ngusinalimbikasya ni kwasalila wandu kuti ndawi syosope pakusapolela yakulya, apopeleje soni kuti " Ambuje awujaliwe soni mpingo wetu" Ali ngawa lipopelo lyakulinonyela. Kuli kuweceta kuti m'we tuli mbali ja liwasa lya mpingo ni tukusaka majali pa mpingo wetu.

Tukumanyilila kuti patukwajaliwa wane, tukulijaliwa soni wacimisyewe. Wosope wene tukusaka kunonyelwa ni majali ga Mlungu kuti tumtumicile cenene.

Pana soni litala line lyakupopelela liwasa lya Atati. Jikusakwawa acimjetu mlope mu mpingo. Komboleka kuwa wandu wali mu ciwanja cimo kapena wakusakamula nawo masengo ganegakwe pa mpingo. Pana jwamkulungwa jwine juwaliji mu gulu jakupopelela yimo. Jwalakweju wapikene jwine ali mkusala cakusausya cakusosa mapopelo cekulungwa. Ni yamkwayiye mtima mlope mpaka wamsalile mjawojo kuti: "tinampoleleje lisiku liliyose acino cijuma cino" ni watesiledi. Mlungu wajanjele mapopelogo ni paliji pana kupundanganya kwekulungwa. Ni wapopelele wandu wajinji canti myoyo kutandila lyele lisikulyo.

Kuli kwakusosekwa kamucisiana jwine ni mjakwe kuitila mu cinonyelo ni mapopelo. Kusyenedi aku ni gopolela kwakuti " mkaliwalilaga liwasa lya Atati."

D. MWAWALANJILE WALI JIKA.

"Atati âwa âwanace âwa masije ni
âwakwacenjela acakongwe âwa masije, ali Ambuje,
âwakutama ku malo gawo gamaswela.

Ambuje akwapa malo âwandu âwakusoâwa malo gakuti atameje;..." (Masalimo 68:5,6)

Tukutama mcilambo ca ujika mlope. komboleka kuliwona kuti uli jika atamose uli sikati ja citimwindi ca wandu. Wane akuyipikanicisa yeleyi ligongo ndawi syejinji akusawa ali mkupikana ujika.

Pana wandu wali acimijawo palipose. Komboleka kuti wane tuwandikene nao nyumba. Komboleka kuti kusaku akuwoneka mpela yosope yikwenda cenene nambo mkaati mwa mtima wao ali mkupikana kuti wangasosedwa, wakuwen jedwa ni wangoonye ledwa. Pana wandu pa cilambo pano wakuti nganakoleje mundu jwakuti wapopelele.

Naga wao ali mpela wandu wamti miyyi, nikuti Mlungu akwete masengo gawili kwa wao. Candanda akusaka wao ayimanye mwayikusawela naga jwine ali mkukunonyela, kukusamalila ni kukupopelela mu liwasa lyao mwa Ambuje. Cawili akusaka kwapa utumiki wapedela kwa wandu wakupikana ujika, wakusigala watayiceje kwa wao.

Cisyesyene ni cakuti Mlungu akusaka kuti m'we wosome tujembeceleje kusimana ni wandu wakuti tawe watutwapopeleleje. M'we wosome twamanyi wandu wa dela jetu, ku mpingo, ku sukulu kapena ku masengo wakusaoneka kuti akulaga ni ujika.

Pane akusaoneka wakusaonisa kwapikanicya. Akusaoneka mpela wangakamulana ni wandu wali nao. Pa lyele ligongoli akusagamba kwaleka kumbali ni ngawalanjila. Mwine akusasaka kuti ajendeje ni kamulana ni wane nambo ngakumanyilila kuti tatandile papi.

Akusosa mundu jwine jutuwanonyele ni kwakamucisya. Komboleka kuwa soni komboleka ngawa kuti Mlungu akusosa kuti wao awe mjavo jwa padela. Nambo komboleka kutanda kumpopelela mundu ja pajika canti myoyo mwine Mlungu komboleka kumtumisya mu liwasa lyakwe kupitila mu mapopelo gawo.

Cinasalile cakuyicisya cakwe. Taciyowona kuti tacitanda kwasamalila ni kwanonyela wandu wa pajikawa. Mlungu taciwika mu mtima mwao cinonyelo cacili mu mtima mwakwe ca wandu wakulanga mpela welewo. Ni cinonyelo cikusakangala kwayicila ni kwalimbikasya wandu wa li pa jika ni wakupikana kupweteka.

Yeleyi yalocele mu umi wa Yesu pawaliji pa cilambo pano. Sano kupitila mu cisuwelo ni macili ga Msimu wakwe. Makono getu komboleka kusyuka makono gakwe. Tukusasuka liwasya lyakuti Mlungu akusatumisya wandu wakwe wali pa jika.

MTWE WA 6

KWAPOPELELA MASENGO GA KULALICILA YA YESU KU CILAMBO COSOPE

A. MPINGO WA CILANDANYO PA MAPOPELO NI UTUMIKI

Tukuwusimana mpingo wambone kobasi mu buku ja masengo. Waliji mpingo wakupopela ni mpingo wakutenda masengo ga utumiki, ni uli mpingo wakutesya lungw'anu kwetuwe. Mpingowu waliji mu dela ja Antiokeya. Waliji mpingo wandanda wa wandu wanganawa wa ciyuda. Soni acimlongosi wakumanyika mu mbili ja cikhlistu watyocele ku wele mpingowu. Mu buku ja Masengo tukupikana ya ndamilo syakwe ni masengo ga utumiki wakwe.

Pa Masengo 13:1-3 akuweceta kuti:

"Mu mpingo wa ku Antiokeya, mwapali âwakulocesa ni aciâwalimu; Banaba, Simiyoni ... Lusio jwa ku Kulene ni Manaene ... kwisa soni Saulo. Katema kiâwalambilaga Ambuje ni kulijima kulya, Msimu âWaswela âwatite kuti, "Mwasagule Banaba ni Saulo kuti akakamule masengo ganaâwilanjile kutenda." Piâmasile kulijima kulya ni kupopela, âwasajice magasa ni watumile."

Jele ndimeji jikwete yindu nsano na cimo yakutulocesyā m'we kuti Mlungu akusakamulicisyā masengo wandu wanti uli pakwenesya utenga wakwe ku cilambo capasi.

1. Waliji Wandu Wa Malowe

Pakuweceta ya wakulocesyā ni aciwalimu mu msela wandandawo, tukumanyilila kuti waliji wandu wawajiganyisye ni kutamilicika mu malowe ga Mlungu

2. Waliji Wandu Wakumkumbicisyā Mlungu

Syaliji ndamilo syao sya kwalambila Ambuje. Ni kulambila kwawo, wapocelaga Ambuje lisiku lililyose lya umi wao. Kusimanikwa kwa Mlungu jwamswela sikati jao, kwaliji ndandilo ja umi wao wa usimu

3. Waliji Wandu Wawakumanyi Kuligosa Pa Kulijima Kulya

Pakutenda myoyo walipelece ni yakusosa ya umi wa cilu pasi pa ulamusi wa msimu waswela. Kulijima kulya lili litala lyakuwecetela kuti: “une ndili jwa usimu mkanimbe kuwa mundu jwa ku cilu”

4. Waliji Wandu Wawapikanaga Ni Kutenda Malowe Ga Msimu Waswela

Wawaga wakoseka kupikanila lilowe lyakwe, ni wasosaga ulongosi wakwe mu umi wao ni pa mpingo.

5. Waliji Wandu Wakupopela

Pa kusala soni ya kupopela ni kulijima kulya, kukulosya kuti wanduwa wayimanyi ngondo ja usimu jili jakusosekwa mu utumiki wao. Utumiki wao ujende cenene naga kunyumba kwakwe kuli kwana macili ga wandu wakupopela.

6. Waliji Wandu Wakulipeleka Kwa Wakutumicila Wao.

Pawasajice magasa pa jemanjavo, walumbikenye ma umi gawo kwa wele wawatumisyaga kulalicila. Tacipelenganaya kwakamucisyā mu litala lililyose. Wakutumicila wao ngasaliwalicika.

Muwawelete mpingo wa ku Antiokeyawu wukutupa pakutandila majiganyo getu ga kupopelela masengo ga utumiki. Tulijiganye soni ya mpaka tujile kagawe udindo wetu wa kupopelela masengo ga kulalicila ku cilambo cosope mwangapesya. Naga tutande ganisya kuti masengo gali gekulungwa mlope, komboleka kuti ngasitutanda kose. Mlungu akusaka kumbi m'we soni tukole lukondwa luwakwete wa ku mpingo wa ku Antiokeya pandawi jiawusile Paulo ndi Banaba ni kwasalila yatite pakwanga Mlungu mapopelo gawo. Kwanjidwa mapopelo jili mbote jekulungwa ja cikulupi ndi kupikanila.

B. YAKUSAUSYA YA MAPOPELO

Kupopelela masengo ga utumiki kuli kwelekangane ni mapopelo gatuwele tuli mkgwanyana. Kutupa kwa yilambo ni yakutendekwa mu yilamboyo, yikusajigalila yejinji kupunda mapopelo getu ga lisiku lililyose.

1. Ungamanyilila Ya Mapopelo

Akhlistu wajinji ngakusakulupilila kuti mapopelo gawo gamwana mpaka gasinde muyikwendela yingu pa cilambo ca pasi. Wangakombola kuyiganicisa. Ganisa kwanti myiyi kukusyatyoce mu nganisyo syakufooka ni syangamanyilila ya mugakugawela ni katende ka mapopelo.

Kupopela ngawa gamba kupikana cenene, kapena ganicisa cenene. Nganiciwa cindu cine cakwe cangamanyika cagamba kujagawa mwinani kuti mwine ndawi jine jakwe cicimtendela jwine jwakwe cambone.

Kupopela jili mbali jetuwe jakuyikasya lisosa lya Mlungu ni macili gakwe pa cindu cinecakwe cicikusosekwa. Mlungu atupele m'we upile ndi ukumu wakutamilisyia lisosa lyakwe pa cilambo mpele muliwelele kwinani. Mlungu atesile cilanga kuti tawice macili ni ulamusi wakwe kunyumba kwa mapopelo getu.

2. Kayicila Ni Kwasa Mtima

"Naga ngawa ni Mlungu,m'we ngawa mkombola kalikose;nambo naga ngawa ni m'we, Mlungu ngatenda kalikose"

Ligongo mapopelo gakusakoposya macili ga Mlungu, satana wangasaka kuti m'we tupopele, ni akusatukumudwisyaga mu matale gejinji. Akusasaka kuti tuyiwoneje kuti mapopelo getu gali gejipi mlope, gangali macili, soni ganandipe mlope kuti gasinde yindu yine yakwe yekulungwa soni ya kwakatalika mlope.

Soni wandu nganakola nganisyo syambone pa yindu yayikutendekwa mu yilambo yine. Akusakulupilila kuti pangali ca mpaka ciwecetedwe kapena kutendekwa kuti yindu yisinde. Yindu yiciwa muyikwenela kuwela.

Awu unami wakayicila wa satanawu uli wakusausya kuwumasya ligongo ngatukusajanjidwa ndawi jijojo pakutupolela yindu pa cilambo. Pakusapolela yindu yatuwandikene nayo, ndawi syejinji tukusakuwona kwanga kwakwe mwacitema. Ayi yikusatawa ndi kulimbisia cikulupi cetu.

Nambo yindu yakutendekwa mu yilambo ya kusa yikusajigala ndawi jelewu kuti tuloleumboni wa cakulinga ca Mlungu cili mkuendekwa. Nambo komboleka yindu kutendewa, m'we ni ngamanyilila ligongo tuli kwakatalika.

Konjecesy soni , matala ga Mlungu gali gelekangane ni getuwe. Masengo ga Mlungu ni yakulinga yakwe yikusawa yakupunda kaganisyé ni kupikanicisyá kwetu. Malowe gakusalila kuti atamose wakulocesyá wa mu cilangano ca kala, ngamanyilicisyá cisinsi ca mpingo. Chakulinga cakuti ayuda ni wandu wa mitundu jine taciwa cilu cimo mwa Yesu, caliji cindu cakuti nganaciganicisyaga.

Yeleyi soni kwetuwe lelo jino. Mlungu akusajangaga mapopelo mu litala lyakwe nambo soni jwa msyenejo. Ndawi sine tukusamanyilila, nambo ndawi sine ngatukusamanyilila. Yatukumanyila ni yakuti atesile cilanga cakwanga mapopelo getu naga tukupopela ni cikulupi ndi mtima wakupikanila.

3. Yakulinga Yacabe

Yakulinga yacabe kombole kuwa ntando wa yakusausya yine mu mapopelo. Naga tuli mkupopela mwakulikanganika, masengo getu gaciwa cindu ca usito ni cakupesya. Kupopela kusyene kutyoceleje mu mtima ni nganisyo, syakupocela macili ni kulongoleledwa ni Msimu waswela.

Matala gacabe soni mpaka gajonanje lisosa lyetu lya kupopela. Mmagongo jwetu mpaka atutule jimo mwa mbali syacabesi. Naga akulepele kutulekasya kupopela, akusatutenda kuti mapopelo getu gaweje ga cisawawa ni gangamanyika mwakuti ngatukusamanyilila naga ganjanjidwe kapena iyayi.

Mwa cilandanyo kupopela kuti “ Ambuje ajaliwe liwasa lyetu, cilambo cetu ni cilambo ca pasi” nganiyiwa yakamula mtima kwetuwe, atamose kwa Mlungu kwakwe. Ali lili ligongo lyakuti cikulupi cikusosa kuwa ca kulunjika. Naga tupopesile mwa kulunjika, tukusakombola kuwa wakwembecela.

Nambo soni mbali jine kola mndandanda wa yindu yejinji yakuyipopelela, yangali cilongosyo ca Mlungu mpaka yiwe yakupesya ni kutesya mbwaji. Yesu watetele ya mteto wa gambaga kuwilisya Wilisya - kukuli kuweceta malowe gejinji nambo gangali cakulinga kapena macili, pa ndawi ja kupopela pa Matayo 6:7.

Naga yakulinga yetu kapena matala nganigwa gambone tukusajasa mtima mwacitema ni kuleka. Ni tukusatanda kupikana kulemwa ni wangali macili. Tukusasowa yakutenda.

Pa magongo gelega tukusaka kujigala ndawi pa mitwe ja yakulinga ni katende ka mapopelo. Tukusaka kumanyilila Kupopelela kusyesyene ni cici nambo soni jikusakamula masengo canti uli mu umi wa mundu.

C. NGOPOLELO JA KUPOPELELA

Ngopolela jangasausya ja kupopelela kuti “**kupopela mmalo mwa wandu wane, mwakulongoleledwa ni macili ga Msimu waswela, uli mkumanyilila kuti Mlungu tajanje**” ngopolele jeleji mpaka tujigawe patatu. Ni titulijiganye panandi panandi.

1. Kupopela Mmalu Mwa Wandu Wane

Kupolela kukusagopolela kupopela ligongo lya mundu jwine ngawaga wasyegwe. Mundu jwinejo komboleka kuwa jwakuti ali ciwandi ni jwakunonyelwa kwa wao. Akusaganisyaga mlope ya umi wakwe wambone ni ya umi wakwe wangamala. Ni akusapopelaga ni mtima wosome nambo soni mwacitema. Mundu komboleka kuwa jwakuti ngakummanyilila. Jwine jwakwe jwakusatama kwakatalika ku cilambo cakusa. Jwine jwakwejo komboleka kuwa mundu jwakutumicila mu cilambo cinecakwe. Komboleka soni kuwa cilambo cine. Cakusosekwa mu ngani ja kupopelela ni cakuti ukumpolela jwinepe.

2. Mwa Macili Ni Kulongoleledwa Ni Msimu Waswela

Kupopelela gali mapopelo ga kulongoleledwa ni kamusidwa ni Msimu waswela. Malemba pa Aloma 8:26,27 gakutusalila kuti Msimu waswela ali wakoseka kutukamucisya pandawi jingatukumanyilila yatujile ni yindu yakupopelela. Pana yindu yejinji yakuti ngatukusayipikanicisya. Pana ndawi mpelesi cili cakulimbisya mtima kumanyilila kuti tukwete mkamusi jatalongolele mapopelo getu mwakamulana ni lisosa lya Mlungu.

Msimu waswela ngagamba kulongolela mapopelo getu basi nambo soni tatutendekasye kuti tupopele. Pana ndawi sine syakuti Mlungu akusatukumbusya ya wandu wane. Tukasijigala nganisyo mpela syelesyo mwakunguluka. Gakusawa malowe ga Msimu waswela gakuweceta kuti: “mumpopelele aju munduju, soni mumpopelele sampano!” uli kuli kuwilanjidwa kwao ku masengo gakupopelela, akasagawika kumbali.

Tukulosa sano kuti mu kupopelela, Msimu waswela akusatusalila ya ndawi jakupopela, yatujile kapopele ni jwakuti tumpopelele. Jele ni mbali ja Mlungu, mbali jetuwe ni kupikanila ni kupopela.

3. Kumanyilila Kutti Mlungu Tajanje

Kupopelela kukusasindaga yindu. Mlungu akusatendega cinecakwe cakuti ngamkanicetenda ikakwe kuti nganapopela. Cisyesyene cakuti mapopelo mpaka gasinde yindu yine yakwe mu umi wetu ni mu cilambo cetu cikusawa ca cilendo ku nganisyo syetu sya umundu. Yipembeso yangakulupilila Mlungu yikusajiganya kuti tuli wandu wakulepela, wangali cembeceyo, soni wangali pakutilila. Nganisyo syelesi sikusajenela ku cilambo cosope mwakutesya canasa. Sogolo wajilinganyisye kala, yitusimana nayo wayiwisile kala, ni pangali ca mpaka tutende.

Yesu wajiganyisye yakulekangana ni yeleyi. Mu umi wakwe, ciwa cakwe ni kwimuka ku wawe kwakwe kwawicile umboni kuti cilamboci mpaka cikulupuce. Mpaka tuciwujikasye ku lisosa liwekwete Mlungu pandanda. Yosope nganiyijonasika. Nganatulamula kuti tuwe, nambo watulinganyisye kuti tukole umi. Yesu pawayice pa cilambo pamo, walocesye unami wa satana, watuwilanjile ku umi wa cikulupi, cembeceyo ni cinonyelo

Konjecesyapo watupele m'we ufulu wakupopela mpela muwapopelele. Macili ga Mapopelo gakwe galiji gakusinda umi ni kutenganga cilambo. cilambo cino casindile.

Nambo pandanda Yesu wajenele kwika, Yesu wajenela kutenda cinecakwe ni kumlocesya mundu jwa mcipi ni cipi cicaliji mwa wandu. Naga Yesu watesile myoyo, m'we soni kwende tutende!

D. KUPOPELELA NI NGONDO JA USIMU

1. Macili Ga Usimu Gagapali

Naga tuli mkusisa satana, tuciwa pa ngondo ja usimu. Kuti m'we tupundanganye, cili cakusosekwa kumanyilila macili ga usimu gagakusewesa. Gapali gatatu;

a. Msimu Wa Cipi

b. Msimu Wa Mundu

c. Msimu Wa Mlungu

2. Ndamilo Sya Malingana Ni Macili Ga Misimuji

a. Mundu Ali Pasi Pa Ulamusia Wa Satana

Jwamkulungwa jwa msimu wa cipi ni satana, Mmagongojo. Ngatukuweceta ya kacindu kamwana kakusecesya. Tukuweceta ya msimu wa ngalwe ni wakalamuka, wuwukusasisyana ni Mlungu ni yakulinga ya Mlungu.

Pakuti Mlungu wampanganyisye mundu ni cakulinga cambone, yangasimonjesya kuti mundu akusawa jwakusawen jedwa mlope ni satana. Satana akusawengana ni cilicose cicikusalocesya umbone ni cakulinga ca Mlungu

Pa ligongo lyelelo satana walambwisy e a Hawa ni kwagwisya Adamu ku ndamilo jiwasakaga Mlungu ni ulamusi wuwaapele Mlungu. Kutandila jele ndawijo, mundu awele ali pasi pa ulamusi wa satana nambo soni lisosa lya cilu cakwe ca sambi.

b. Mundu Ali Pasi Pa Ulamusia Cilu Ca Sambi

Umi wa mundu, wawuli – Lisosa, nganisyo, ni yakuyipikana mcilu, naga kutyosya Msimu wa Mlungu, mmalemba akusayitendaga “cilu”

Mwana macili gejinji ga yakusakala mu cilu yakuti mpaka umi wetu, mwangakamusidwa ni satana. Mpaka tulujonanje wacimisyewe!

Mundu pajikape mpaka ajonasice, akawe Mlungu amkamucisye. Atamose yambone yakusatenda pa cilambo ca pasi, pa mbesi pakwe yikusajonasika.

Kutandila msimu wa cipi ni msimu wa mundu msyene, yikumtutula mundu ku malo gamo; gagali malo ga ciwa ni conasiko. Cili cindu cakogoya ni kutesya canasa kuwa kuti pali pangali lilanguka lyakuwala mlope – wali Ambuje Yesu Mkhlistu.

c. Mundu Akusalamulila Kupitila Mu Macili Ga Msimu Waswela.

Mu cilambo ca cipi ci, jwalakwe wayice, ni kuyikasya mtuka wapenani wa Mlungu, wali Msimu waswela. Mu macili ga wele Msimu wakupeleka umi wu, mundu mpaka apakombole kulamulila soni macili ga cipi ga ciwa ni conasiko.

Patukusalipeleka kwa Yesu Mkhlistu mpela Ambuje jwa umi wetu, tukusawa pasi pa ulamusi wakwe. Mu macili ga wele ulamusiwu, mpaka tusisyane ni macili gakusakala ga cilambo, cilu ni satana.

Yesu Mkhlistu watugopwele m'we kuti tuwe mpela wamasengo wakwe ni kujigalila ufulu welewu kwa wandu wane. Watukulupwisye – kutusuma ni kutuwucisya mu cakulinga ca Mlungu – kuti tuwe wakutumicila cisywelo cakwe ku cilambo cosope.

3. Kupopelela: Cida Ca Macili

Tukusakwanilisa masengo ga usimuga mu matala gawili – kuitila mu kupopela ni kutumicila – nambo soni pakuya ndondomeko jelejo. Kupopelela kukusalinganya litala ni kosekasya dela ku utumiki wakupundanganya. Kukusakasaga macili ga unami wa satana, wuwusayikasya cipi ku mitima ni nganisyo sya wandu.

Kupopolela soni kukusakamucisya wakutimicila – wandu wakutumidwa ni Mlungu – wakujigalila ngani jambone ja utenga ku cilambo cosope. Kuti jemanjawa akombole kwaya, kunonyela, kutumicila, kupelecela, kamucisya ni kutumicila umi wa Mlungu jwa umi, mu macili gosope ni ulamusi wa msimu waswela.

Mpingo wakupundanganya ukusawa mkamulano wa wakulupilila wali wakulipeleka ku mapopelo ni utumiki. Ni tuyawelele ku mpino wa ku Antiokeya.

Wajiganyidwe mu matala ga Mlungu ni wasosaga kupikanila malowe gakwe ni kwembecela pa jwalakwe. Pawatendaga myoyo, Mlungu watite: “ tisinde cilambo cimkutama, ni tinamkamulisyé masengo jemanja kutenda yeleyo”

Wamanyilile kuti kusinda kujigalile kulijima kulya ni kupopela ni kutumisya wakutimicila ku madela gane. Wapikanile. Ni cilambo casindidwe. Mbili jasindile mu jele dela josopejo kupunda ya ka 2000 yipite ni maumi ga wandu gasindile ligongo lya mapopelo. Wandu wakupopela akusasinda ndamilo sya wandu pakusasosa cakulinga ca Mlungu ni kuwa wakupikanila ku lisosa lyakwe.

Ndawi syejinji cikulupusyo cetu cikusaoneka mpela litala lyagamba kuwambalila yakusakala ya pacilambo ca pasi pano. Mlungu akusaka kucilocesy cilambo capasi cinonyelo ni canasa cakwe mpela muwatulocesye m'we. Nambo yeleyo mpaka ayitende kuitila mwa

wakulupilila wali wakupopela ni kupikanila – ni myoyo kumpa Mlungu mpata wakamulila masengo.

E. YINDU YITATU YAKUSOSEKWA MU KUPOPELELA

Konjecesy pa ngopolelo jetu ja mtwe wetu wakupopelela pana soni yindu yitatu, gele malowe gatatuga gana ngopolelo ja macili. Candanda **kwinjilila**, cawili **Kwima cilikati** catatu **Kulekasya**. Kwende sano tulole cimo cimo.

1. Kwinjilila

Kwinjilila kukugopelela kwika pa malo uli ukwete cakulinga ca Mlungu. Yesu wayice mcilamo ca pasi kuti m'we tumanyilile ni kupocela cakulinga ca Mlungu mu cikulupusya ca mundu. Wawkete macili ndi ulamusi wakutenda yeleyo, ni pawateselepo wewisile macili ga cipi pasi pa sajo syekwe. (Matayu 28:18)

Sano akututuma m'we ku cilambo cicoco ni ulamusi wakwe uwowo.

“Mpela Atati ḫandumisye une, une soni ngumtumisya jemanja... Nimpele jemanja macili gakupakombola kuliwata majoka ni yiŵalaŵala ni kugapunda macili ga Satana m'magongo jwenu. Pangali cindu cilicose citicimwulasya jemanja” (Yohane 20:21; Luka 10:19)

Apa Yesu akuweceta kuti “Jemanja mli yiwalo ya cili cangu. Naga ayi yindu yausakalayi yikwenela kuwa pasi pa sajo syetu, wao akwenela kwinjilila. Naga ajiweni misimu jakusakala ja pa cilambo, misimu ja cilu ni satana ali mkamula masengo gakwe, akwete ulamusi wakwinjilila. Akasagamba kulolela.”

Mwine akuwusya kuti “ nambi tutende uli?” APOPELE! Wajinji akusatiga “nambo tupopesile, sano tutende cici? Apopele! Kaneko ni APIKANILE! Kupopelela gali malo gagakusatyocela kwinjilila kwa usimu.

Naga akukumbucila kwa Antiyokeya, walijimile kulya, ni kupopela, wapikene malowe ga Msimu waswela ni kupikanila. Pawaweceta ni Mlungu, Mlungu soni waweceta nao. Wandu wakusausyaga ndawi syosope yakuti atende akwenela kulilola kuti umi wao wa mapopelo uli wanti uli.

2. Kwima Cilikati

Pa cilikati pakusawa mpela pa malo pagakusimana mata la gawili gakutyocela kwinckwine, ni pakusawoneka mata la mcece. Wane akusati pa malekano. Mlungu taciyikasya wandu wakulekangalekangana kwetuwe, malo ni yakutendekwa yejinji ni yakusausya yao yiciyika kwetuwe.

Naga tujigalile kupunda ni macili ga Yesu mu yele yosopeyi, pakusawa pana kusinda kwakutycela kwa Mlungu. Pa msalaba, Yesu Khlistu wakasile macili gosome ga cilambo, cilu ni satana. Kwaliji kupunda kusyene – kugomeka kwemalilwe!

Nambo macili ga msalabaga gakwenela kuwicidwa pa yakusowa ya cilambo. kupopela ni kukusawika gele maciliga pa yakusausya yatukusasimana nayo.

Yesu atesile yakusosekwa yosope yene kuti cilambo cikulupuce. Sano tukwenela kutenda mbali jetu. Yeleyi yikoneka cenenepe mu dogosolo ja cikulupusyo. Mlungu wacinonyele cilambo cakwe mwakuti watumisyé mwanace jwakwe kuti awe ligongo lya sambi syetu. Jele jaliji mbali jakwe.

Mbali jetuve kuli kwika kwa Mlungu mu mapopelo ni kuplesya pamo ni sambi syetu syakwe ni cikulupusyo ca mwanace jwa Mlungu.

Macili ga msalaba gasigakwaya ma umi kapena cilambo capasi akawe tuli tupelece ma umi getu ni yakusowa ya pacilambo kwa Mlungu mu mapopelo. Jele ni mbali jetu – kupopela ni kwala kukwasalila wandu.

Pana wajinji mu watukusasimana nawo mu umi wetu wangakumanyilila ya cinonyelo ca Mlungu kapena macili gakwe. Wangamanyilila yitajile kayice kwa jwalakwe mu mapopelo. Akusaka jwine jwakwe kuti apopele mmalo mwawo. Yakusowayi yikusatandila mu madela gatukutama ni kwenelaga mpaka ku cilambo cosope.

Mwine pana mjavo jwalikumala liwasa lyakwe; mwine wane ali ku ndende ligongo lyakulalicilla utenga; yakusausya yayikoneka mu yilambo yetu; madele gakuti mwangali ufulu wandu kapena wa dini; sala ni yilwele ya pa cilambo cosope, pana yejinji ya mpaka yisalidwe.

Ndawi jilijose ali apopesile akusajonjencesya ciwanja ca wandu wakupopela lisiku lililyose, soni ngasicimala mpaka kwika kwa Yesu. Pangali cindu camwana, pakuti gali mpela makiyi ku kwenda kwa macili ga Mlungu mu ndawi syakumalisya sino, gatigacijenela pa cilambo ca pasi

Cicili cimo ca ucimwene wa Mlungu ni kupopelela. Ma ulamusi ga cipi ni satana ngawa mkuwugomeka mpingo wa Yesu naga uli utindiwele pa mapopelo

Komboleka kuwa pana wane wakusaka pe kuweceta kuti, “ nambo mundu ukwenela kutenda yejinji kupunda gamba kupopele” ayo yili yisyene, nambo nganawonece je wandu wawagambile kupopela ni kulecela papopo, mlopelope ali apopesile kusyene.

Mpela kwa Antiokeya, kupopela ni kulalicila yikusajendela imo.

Pana wandu wakusalinga kutenda yindu yejinji, nambo ali ngakupopela. Wandu wakutanganidwa ni kutenda yindu yejinji, nambo wangali mapopelo wangapundanganya. Cakusapindula ni kulipesya acimisyene ni jwalirose jwakutenda nao, ni kupata ya mnono mu yosope Yatesile.

Kusyenedi, kupopela ni kulalicila yijendeleje yimo.

3. Kulekasya

Kulekasya kukusagopolele kwimika, kujigala kapena soni kuyicisya munyuma cindu cine cakwe. Yikusaowone mu ma ung'asi gane ga mpila. Mpila ukusawa uli mkwaula mbali jine, ni akusayika jwa timu jine ni kusumula ni kutanda kuwujawusya soni mbali jine. Waoneceje mpela akupunda wala, yindu yasindile lingongo pana jwine jwalekasisye.

Kupopelela kukusatenda myoyo. Mmagongo akwika mpela cikumbwa. Yindu yikukoneka mpela yangali cembeceyo. Kaneko jwine akwinjilila; akuwika macili ga msalaba pa kupopela, kukuli kwinjilila, kaneko Mlungu akutanda kwendesya yindu, ni pakoneka kuti pasindile nditu kukulu kulekasya. Pawoneceje mpela satana akupunda, yigalawice sano Mlungu akupundanganya. Gele ni macili ga ucimwene gali mkonecela.

Pauli ndi Banaba pawawujile ku Antiyokeya kutyocela ku ulendo wa pa utumiki wao, wakwete kupundanganya kwakulungwa, kuwayice kukwasalila wandu wawakamucisyé kultipila mu mapopelo gawo. Yikulosya kuti jaliji ndawi ja kusangalala kwekulungwa (alole Masengo 14:26-28)

Yindu yitatu ya kupopelela yituyisasileyi yakamwile masengo jwa jemanjao, nikuti mpaka soni yikamule masengo ni wao.